





文山先生

對策

卷之二

文州通之

甘州事初

郭州事

由新遠也

亦與公

欲其用

是之言





文山先生全集卷之三

文集

對策

御試策一道 有題

蓋聞道之大原出於天超乎無極大極之妙而實不離乎  
日用事物之常根乎陰陽五行之曠而實不外乎仁義禮  
智剛柔善惡之際天以澄著地以靖謐人極以昭明何莫  
由斯道也聖聖相傳同此一道由修身而治人由致知而  
齊家治國平天下本之精神心術達之禮樂刑政其體甚  
微其用則廣歷千萬世而不可易然功化有淺深證效有  
遲速者何歟朕以寡昧臨政願治于茲歷年志愈勤道愈



遠宵乎其未朕也朕心疑焉子大夫明先聖之術咸造在  
廷必有切至之論朕將虛已以聽三墳而上大道難名五  
典以來常道始著日月星辰順乎上鳥獸草木若於下九  
功惟叙四夷來王百工熙哉庶事康哉非聖神功化之驗  
歟然人心道心寂寥片語其危微精一之妙不可以言既  
歟誓何爲而畔會何爲而疑俗何以不若結繩治何以不  
若畫像以政凝民以禮凝士以天保采薇治內外憂勤危  
懼僅克有濟何帝王勞逸之殊歟抑隨時損益道不同歟  
及夫六典建官蓋爲民極則不過曰治曰教曰禮曰政曰  
刑曰事而已豈道之外又有法歟自時厥後以理欲之消

長驗世道汙隆陰濁之日常多陽明之日常少刑名雜霸  
佛老異端無一毫幾乎道駁乎無以議爲然務德化者不  
能無上郡鴈門之警施仁義者不能無末年輪臺之悔甚  
而無積仁累德之素紀綱制度爲足維持憑藉者又何歟  
朕上嘉下樂夙興夜寐靡遑康寧道久而未洽化久而未  
成天變洊臻民生寡遂人才乏而士習浮國計殫而兵力  
弱符澤未清邊備孔棘豈道不足以御世歟抑化裁推行  
有未至歟夫不息則久久則徵今胡爲而未徵歟變則通  
通則久今其可以屢更歟子大夫熟之復之勿激勿泛以  
副朕詳延之意寶祐四年五月八日

臣對恭惟皇帝陛下處常之久當泰之交以二帝三王之  
道會諸心將三紀于此矣臣等鼓舞於鳶飛魚躍之天皆  
道體流行申之一物不自意得旅進于陛下之庭而陛下  
且嘉之論道道之不行也久矣陛下之言及此天地神人  
之福也然臣所未解者今日已當道久化成之時道洽政  
治之候而方歎焉有志勤道遠之疑豈望道而未之見耶  
臣請泝太極動靜之根推聖神功化之驗就以聖問中不  
息一語爲陛下勉幸陛下試垂聽焉臣聞天地與道同一  
不息聖人之心與天地同一不息上下四方之宇往古來  
今之宙其間百千萬變之消息盈虛百千萬事之轉移闔



闢何莫非道所謂道者一不息而已矣道之隱於渾淪藏於未瑯未琢之天當是時無極太極之體也自太極分而陰陽則陰陽不息道亦不息陰陽散而五行則五行不息道亦不息自五行又散而爲人心之仁義禮智剛柔善惡則乾道成男坤道成女穹壤間生生化化之不息而道亦與之相爲不息然則道一不息天地亦一不息天地之不息固道之不息者爲之聖人出而爲天地立心爲生民立命爲往聖繼絕學爲萬世開太平亦不過以一不息之心克之克之而修身治人此一不息也克之而致知以至齊家治國平天下此一不息也克之而自精神心術以至於

禮樂刑政亦此一不息也自有三墳五典以來以至於太平六典之世帝之所以帝王之所以王皆自其一念之不息者始秦漢以降而道始離非道之離也知道者之鮮也雖然其間英君誼辟固有號爲稍稍知道矣而又沮於行道之不力知務德化矣而不能尼之以黃老知施仁義矣而不能遏之以多欲知四年行仁矣而不能不畫之以近效上下二三千年間牽補過時架漏度日毋恠夫駁乎無以議爲也獨惟我朝式克至于今日休陛下傳列聖之心以會藝祖之心會藝祖之心以叅帝王之心叅天地之心三十三年間臣知陛下不貳以二不叅以三茫乎天

運宵爾神化此心之天混兮闢兮其無窮也然臨御浸久  
持循浸熟而筭計見效猶未有以大快聖心者上而天變  
不能以盡無下而民生不能以盡遂人才士習之未甚純  
國計兵力之未甚充以至盜賊兵戈之警所以貽宵旰之  
憂者尤所不免然則行道者殆無驗也邪臣則以爲道非  
無驗之物也道之功化甚深也而不可以爲迂道之證效  
甚遲也而不可以爲速維天之命於穆不已天地之所以  
爲天地也之德之純純亦不已聖人之所以爲聖人也爲  
治顧力行何如耳焉有行道於歲月之暫而遽責其驗之  
爲迂且遠邪臣之所望於陛下者法天地之不息而已姑

以近事言則責躬之言方發而陰雨旋霽是天變未嘗不以道而弭也賑饑之典方舉而都民歡呼是民生未嘗不以道而安也論辯建明之詔一頒而人才士習稍稍渾厚招填條具之旨一下而國計兵力稍稍充實安吉慶元之小獲維揚瀘水之雋功無非憂勤於道之明驗也然以道之極功論之則此淺效耳速效耳指淺效速效而遽以爲道之極功則漢唐諸君之用心是也陛下行帝而帝行王而王而肯襲漢唐事邪此臣所以贊陛下之不息也陛下儻自其不息者而充之則與陰陽同其化與五行同其運與乾坤生生化化之理同其無窮雖充而爲三紀之風移俗

易可也雖充而爲四十年國空刑措可也雖充而爲百年  
德洽於天下可也雖充而爲十世過曆億萬年敬天之休  
可也豈止如聖問八者之事可徐就理而已哉臣謹昧死  
上愚對臣伏讀聖策曰蓋聞道之大原出於天超乎無極  
太極之妙而實不離乎日用事物之常根乎陰陽五行之  
賾而實不外仁義禮智剛柔善惡之際天以澄著地以靖  
謐人極以昭明何莫由斯道也聖聖相傳同此一道由修  
身而治人由致知而齊家治國平天下本之於精神心術  
達之於禮樂刑政其體甚微其用則廣歷千萬世而不可  
易然功化有淺深證效有遲速何歟朕以寡昧臨政願治

于茲歷年志愈勤道愈遠宥乎其未朕也朕心疑焉子大  
夫明先王之術咸造在庭必有切至之論朕將虛已以聽  
臣有以見陛下邇道之本原求道之功效且疑而質之臣  
等也臣聞聖人之心天地之心也天地之道聖人之道也  
分而言之則道自道天地自天地聖人自聖人合而言之  
則道一不息也天地一不息也聖人亦一不息也臣請邇  
其本原言之茫茫堪輿坱圠無垠渾渾元氣變化無端人  
心仁義禮智之性未賦也人心剛柔善惡之氣未稟也當  
是時未有人心先有五行未有五行先有陰陽未有陰陽  
先有無極太極未有無極太極則太虛無形冲漠無朕而

先有此道未有物之先而道具焉道之體也既有物之後而道行焉道之用也其體則微其用甚廣即人心而道在人心即五行而道在五行即陰陽而道在陰陽即無極太極而道在無極太極貫顯微兼費隱包小大通物我道何以若此哉道之在天下猶水之在地中地中無往而非水天下無往而非道水一不息之流也道一不息之用也天以澄著則日月星辰循其經地以靖謐則山川草木順其常人極以昭明則君臣父子安其倫流行古今綱紀造化何莫由斯道也一日而道息焉雖三才不能以自立道之不息功用固如此夫聖人體天地之不息者也天地以此

道而不息聖人亦以此道而不息聖人立不息之體則歛於修身推不息之用則散於治人立不息之體則寓於致知以下之工夫推不息之用則顯於齊家治國平天下之效驗立不息之體則本之精神心術之微推不息之用則達之禮樂刑政之著聖人之所以爲聖人者猶天地之所以爲天地也道之在天地間者常久而不息聖人之於道其可以頃刻息邪言不息之理者莫如大易莫如中庸大易之道至於乾道變化各正性命保合太和而聖人之論法天乃歸之自強不息中庸之道至於溥博淵泉上天之載無聲無臭而聖人之論配天地乃歸之不息則又豈非

不息之道耳是以法



乾之所以剛健中正純粹精也者一不息之道耳是以法  
天者亦以一不息中庸之所以高明博厚悠久無疆者一  
不息之道耳是以配天地者亦以一不息以不息之心行  
不息之道聖人即不息之天地也陛下臨政願治于茲歷  
年前此不息之歲月猶日之自朝而午今此不息之歲月  
猶日之至午而中此正勉強行道大有功之日也陛下勿  
謂數十年間我之所以擔當宇宙把握天地未嘗不以此  
道至于今日而道之驗如此其迂且遠矣以臣觀之道猶  
百里之途也今日則適六七十之候也進於道者不可以  
中道而廢游於途者不可以中途而畫孜孜矻矻而不自

已焉則適六七十里者固所以爲至百里之階也不然自止於六七十里之間則百里雖近焉能以一武到哉道無淺功化行道者何可以深爲迂道無速證效行道者何可以遲爲遠惟不息則能極道之功化惟不息則能極道之證效氣機動盪於三極之間神采灌注於萬有之表要自陛下此一心始臣不暇遠舉請以仁宗皇帝事爲陛下陳之仁祖一不息之天地也康定之詔曰祇勤抑畏慶曆之詔曰不敢荒寧皇祐之詔曰緬念爲君之難深惟履位之重慶曆不息之心即康定不息之心也皇祐不息之心即慶曆不息之心也當時仁祖以道德感天心以福祿勝人

力國家綏靜邊鄙寧謐若可以已矣而猶未也至和元年  
仁祖之三十二年也方且露立仰天以畏天變碎通天犀  
以救民生處賈黯吏銓之職擢公弼殿柱之名以厚人才  
以昌士習納景初減用之言聽范鎮新兵之諫以裕國計  
以強兵力以至講周禮薄征緩刑而拳拳以盜賊爲憂選  
將帥明紀律而汲汲以西戎北虜爲慮仁祖之心至此而  
不息則與天地同其悠久矣陛下之心仁祖之心也范祖  
禹有言欲法堯舜惟法仁祖臣亦曰欲法帝王惟法仁祖  
法仁祖則可至天德願加聖心焉臣伏讀聖策曰三墳以  
上云云豈道之外又有法歟臣有以見陛下慕帝王之功

化證效而亦意其各有淺深遲速也臣聞帝王行道之心  
一不息而已矣堯之兢兢舜之業業禹之孜孜湯之慄慄  
文王之不已武王之無貳成王之無逸皆是物也三墳遠  
矣五典猶有可論者臣嘗以五典所載之事推之當是時  
日月星辰之順以道而順也鳥獸草木之若以道而若也  
九功惟叙以道而叙也四夷來王以道而來王也百工以  
道而熙庶事以道而康光天之下至於海隅蒼生蓋無一  
而不拜帝道之賜矣垂衣拱手以自逸于土階巖廊之上  
夫誰曰不可而堯舜不然也方且考績之法重於三歲無  
歲而敢息也授曆之命嚴於四時無月而敢息也凜凜乎

一日二日之戒無日而敢息也此猶可也授受之際而堯之命舜乃曰允執厥中夫謂之執者戰兢保持而不敢少放之謂也味斯語也則堯之不息可見已河圖出矣洛書見矣執中之說未聞也而堯獨言之堯之言贅矣而舜之命禹乃復益之以人心惟危道心惟微惟精惟一之三言夫致察於危微精一之間則其戰兢保持之念又有甚於堯者舜之心其不息又何如哉是以堯之道化不惟驗於七十年在位之日舜之道化不惟驗於五十年視阜之時讀萬世末賴之語則唐虞而下數千百年間天得以爲天地得以爲地人得以爲人者皆堯舜之賜也然則功化抑

何其深證效抑何其遲歟降是而王非固勞於帝者也太  
樸日散風氣日開人心之機械日益巧世變之乘除不息  
而聖人之所以綱維世變者亦與之相爲不息焉俗非結  
繩之淳也治非畫象之古也師不得不誓侯不得不會民  
不得不凝之以政士不得不凝之以禮內外異治不得不  
以采薇天保之治治之以至六典建官其所以曰治曰政  
曰禮曰教曰刑曰事者亦無非扶世道而不使之窮耳以  
勢而論之則夏之治不如唐虞商之治又不如夏周之治  
又不如商帝之所以帝者何其逸王之所以王者何其勞  
慄慄危懼不如非心黃屋者之爲適也始於憂勤不如恭

已南面者之爲安也然以心而觀則舜之業業即堯之兢兢禹之孜孜即舜之業業湯之慄慄即禹之孜孜文王之不已武王之無貳成王之無逸何莫非兢兢業業孜孜慄慄之推也道之散於宇宙間者無一日息帝王之所以行道者亦無一日息帝王之心天地之心也尚可以帝者之爲逸而王者之爲勞耶臣願陛下求帝王之道必求帝王之心則今日之功化證效或可與帝王一視矣臣伏讀聖策曰自時厥後云云亦足以維持憑藉者何歟臣有以見陛下陋漢唐之功化證效而且爲漢唐世道發一慨也臣聞不息則天息則人不息則理息則欲不息則陽明息則

陰濁漢唐諸君天資敏地位高使稍有進道之心則六五  
帝四三王亦未有難能者奈何天不足以制人而天反爲  
人所制理不足以御欲而理反爲欲所御陽明不足以勝  
陰濁而陽明反爲陰濁所勝是以勇於進道者少沮於求道  
者多漢唐之所以不唐虞三代也歟雖然是爲不知道者  
言也其間亦有號爲知道者矣漢之文帝武帝唐之太宗  
亦不可謂非知道者然而亦有議焉先儒嘗論漢唐諸君  
以公私義利分數多少爲治亂三君之心往往不純乎天  
不純乎人而出入於天人之間不純乎理不純乎欲而出  
入乎理欲之間不純乎陽明不純乎陰濁而出入乎陽明



陰濁之間是以專務德化雖足以陶後元泰和之風然而  
尼之以黃老則鴈門上郡之警不能無外施仁義雖足以  
致建元富庶之盛然而遏之以多欲則輪臺末年之悔不  
能免四年行仁雖足以開真觀升平之治然而盡之以近  
效則紀綱制度曾不足爲再世之憑藉蓋有一分之道心  
者固足以就一分之事功有一分之心者亦足以召一  
分之事變世道汗隆之分數亦係於理欲消長之分數而  
已然臣嘗思之漢唐以來爲道之累者其大有二一曰雜  
伯二曰異端時君世主有志於求道者不陷於此則陷於  
彼姑就三君而言則文帝之心異端累之也武帝太宗之

心雜伯累之也武帝無得於道憲章六經統一聖真不足以勝其神仙土木之私干戈刑罰之慘其心也荒太宗全不知道閭門之耻將相之誇末年遼東一行終不能以克其血氣之暴其心也驕雜伯一念憧憧往來是固不足以語常久不息之事者若文帝稍有帝王之天資稍有帝王之地步一以君子長者之道待天下而晁錯輩刑名之說未嘗一動其心是不累於雜伯矣使其以二三十年恭儉之心而移之以求道則後元氣象且將駸駸乎商周進進乎唐虞柰何帝之純心又間於黃老之清淨是以文帝僅得爲漢唐之令主而不得一儕於帝王嗚呼武帝太宗累

於雜伯君子固不敢以帝王事望之文帝不爲雜伯所累而不能不累於異端是則重可惜已臣願陛下監漢唐之跡必監漢唐之心則今日之功化證效將超漢唐數等矣臣伏讀聖策曰朕上嘉下樂云云抑化裁推行有未至歟臣有以見陛下念今日八者之務而甚有望乎爲道之驗也臣聞天變之來民怨招之也人才之乏士習蠱之也兵力之弱國計屈之也虜寇之警盜賊因之也夫陛下以上嘉下樂之勤夙興夜寐之勞悵歲月之逾邁亦欲以少見吾道之驗耳俯視一世未能差強人意八者之弊臣知陛下爲此不滿也陛下分而以八事問臣合而以四事對請得

以熟數之於前何謂天變之來民怨招之也天視自我民  
視天聽自我民聽天明畏自我民明威人心之休戚天心  
所因以爲喜怒者也熙寧間大旱是時河陝流民入京師  
監門鄭俠畫流民圖以獻且曰陛下南征北伐皆以勝捷  
之圖來上料無一人以父母妻子遷移困頓皇皇不給之  
狀爲圖以進者覽臣之圖行臣之言十日不雨乞正欺君  
之罪上爲之罷新法十八事京師大雨八日天人之交間  
不容髮載在經史此類甚多陛下以爲今之民生何如邪  
今之民生困矣自瓊林大盈積於私貯而民困自建章通  
天頰於營繕而民困自獻助豐見於豪家巨室而民困自

和糴不間於閭閻下戶而民困自所至貪官暴吏視吾民如家雞圈豕惟所咀啖而民困嗚呼東南民力竭矣書曰怨豈在明不見是圖今尚可謂之不見乎書曰怨不在大亦不在小今尚可謂之小乎生斯世爲斯民仰事俯育亦欲各遂其父母妻子之樂而操斧斤淬鋒鏑日夜思所以斬伐其命脉者滔滔皆是然則臘雪靳瑞蟄雷愆期月犯於木星殞爲石以至土雨地震之變無恠夫屢書不一書也臣願陛下持不息之心急求所以爲安民之道則民生旣和天變或於是而弭矣何謂人才之乏士習蠱之也臣聞窮之所養達之所施幼之所學壯之所行今日之修於

家他日之行於天子之庭者也國初諸老嘗以厚士習爲先務寧收落韻之李迪不取鑿說之賈邊寧收直言之蘇轍不取險恠之劉幾建學校則必欲崇經術復鄉舉則必欲參行藝其後國子監取湖學法建經學治道邊防水利等齋使學者因其名以求其實當時如程頤徐積呂希哲皆出其中嗚呼此元祐人物之所從出也士習厚薄最關人才從古以來其語如此陛下以爲今之士習何如邪今之士大夫之家有子而教之方其幼也則授其句讀擇其不戾於時好不震于有司者俾熟復焉及其長也細書爲工累牘爲富持試於鄉校者以是較藝於科舉者以是取青

紫而得車馬也。以是父兄之所教，詔師友之所講，明利而已矣。其能卓然自拔於大俗者，幾何人哉！心術既壞於未仕之前，則氣節可想於既仕之後。以之領郡邑，如之何責其爲卓茂、黃霸，以之鎮一路，如之何責其爲蘇章、何武，以之曳朝紳，如之何責其爲汲黯、望之。奔競於勢要之路者，無恠也；趨附於權貴之門者，無恠也；牛維馬繫，狗苟蠅營，患得患失，無所不至者，無恠也。悠悠風塵，靡靡媮俗，清芬消歇，濁滓橫流，惟皇降衷，秉彝之懿，萌蘖於牛羊斧斤相尋之衝者，其有幾哉！厚今之人才，臣以爲變；今之士習，而後可也。臣願陛下持不息之心，急求所以爲淑士之道，則

士風一淳人才或於是而可得矣何謂兵力之弱國計屈之也謹按國史治平間遣使募京畿淮南兵司馬光言邊臣之請兵無窮朝廷之募兵無已倉庫之粟帛有限百姓之膏血有涯願罷招禁軍訓練舊有之兵自可備禦臣聞古今天下能免於弱者必不能免於貧能免於貧者必不能免於弱一利之興一害之伏未有交受其害者今之兵財則交受其害矣自東海城築而調淮兵以防海則兩淮之兵不足自襄樊復歸而併荆兵以城襄則荆湖之兵不足自腥氣染於漢水寃血濺於寶峯而正軍忠義空於死徙者過半則川蜀之兵又不足江淮之兵又抽而入蜀又



抽而實荆則下流之兵愈不足矣荆湖之兵又分而策應  
分而鎮撫則上流之兵愈不足矣夫國之所恃以自衛者  
兵也而今之兵不足如此國安得而不弱哉扶其弱而歸  
之強則招兵之策今日直有所不得已者然召募方新調  
度轉急問之大農大農無財問之版曹版曹無財問之餉  
司餉司無財自歲幣銀絹外未聞有畫一策爲軍食計者  
是則弱矣而又未免於貧也陛下自旰菑近又創一安邊  
太平庫專一供軍此藝祖積縑帛以易賊首之心也仁宗  
皇帝出錢帛以助兵革之心也轉易之間風采立異前日  
之弱者可強矣然飛芻輓粟給餉餽糧費於兵者幾何而

琳宮梵宇照耀湖山土木之費則漏卮也列竈雲屯樵蘇  
後爨費於兵者幾何而霓裳羽衣靡金飾翠宮庭之費則  
尾閭也生熟口券月給衣糧費於兵者幾何而量珠輦玉  
倖寵希恩戚畹之費則濫觴也蓋天下之財專以供軍則  
財未有不足者第重之以浮費重之以冗費則財始瓶罄  
而壘耻矣如此則雖欲足兵其何以給兵耶臣願陛下持  
不息之心急求所以爲節財之道則財計以充兵力或於  
是而可強矣何謂虜寇之警盜賊因之也謹按國史紹興  
間楊么寇洞庭連跨數郡大將王瓌不能制時僞齊挾虜  
使李成寇襄漢么與交通朝廷患之始命岳飛措置上流

已而逐李成擒楊么而荆湖平臣聞外之虜寇不能爲中國患而其來也必待內之變內之盜賊亦不能爲中國患而其起也必將納外之侮盜賊而至於通虜寇則腹心之大患也已今之所謂虜者固可畏矣然而逼我蜀則蜀帥策瀘水之勲窺我淮則淮帥奏維揚之凱狼子野心固不可以一捷止之然使之無得棄去則中國之技未爲盡出其下彼亦猶畏中國之有其人也獨惟舊海在天一隅逆雛冗之者數年于茲颶風瞬息一葦可航彼未必不朝夕爲趨浙計然而未能焉短於舟踈於水懼吾唐島之有李寶在耳然洞庭之湖烟水沉寂而浙右之湖濤瀾沸驚區

區妖孽且謂有楊公之漸矣得之京師之耆老皆以爲此  
寇出沒倏閃往來翕霍駕舟如飛運施如神而我之舟師  
不及焉夫東南之長技莫如舟師我之勝兀木於金山者  
以此我之斃逆亮於采石者以此而今此曹反挾之以制  
我不武甚矣萬一或出於楊公之計則前日李成之不得  
志於荆者未必今日之不得志於浙也曩聞山東荐饑有  
司貪市權之利空蘇湖根本以資之廷紳猶謂互易安知  
無爲其鄉道者一夫登岸萬事瓦裂又聞魏村江灣福山  
三寨水軍興販鹽課以資逆雛廷紳猶謂是以扞衛之師  
爲商賈之事以防拓之卒開鄉道之門憂時識治之見往

往如此肘腋之蜂蠱懷袖之蛇蝎是其可以忽乎哉陛下  
近者命發運兼憲合兵財而一其權是將爲滅此朝食之  
圖矣然屯海道者非無軍控海道者非無將徒有王瓌數  
年之勞未聞岳飛八日之捷子太叔平符澤之盜恐不如  
此長此不已臣懼爲李成開道地也臣願陛下持不息之  
心求所以弭寇之道則寇難一清邊備或於是而可寬矣  
臣伏讀聖策曰夫不息則久久則徵今胡爲而未徵歟變  
則通通則久今其可以屢更歟臣有以見陛下久於其道  
而甚有感乎中庸大易之格言也臣聞天久而不墜也以  
運地久而不隕也以轉水久而不腐也以流日月星辰而

常新也以行天下之凡不息者皆以久也中庸之不息即所以爲大易之變通大易之變通即所以驗中庸之不息變通者之久固肇於不息者之久也蓋不息者其心變通者其跡其心不息故其跡亦不息游乎六合之內而縱論乎六合之外生乎百世之下而追想乎百世之上神化天造天運無端發微不可見克周不可窮天地之所以變通固自其不息者爲之聖人之外於其道亦法天地而已矣天地以不息而久聖人亦以不息而久外不息而言久焉皆非所以久也臣嘗讀無逸一書見其享國之久者有四君焉而其間三君爲最久臣求其所以久者中宗之心嚴

心無淫于逸無

恭寅畏也高宗之心不敢荒寧也文王之心無滄于逸無  
遊于畋也是三君者皆無逸而已矣彼之無逸臣之所謂  
不息也一無逸而其效如此然則不息者非所以久歟陛  
下之行道盖非一朝夕之暫矣寶紹以來則涵養此道端  
平以來則發揮此道嘉熙以來則把握此道嘉熙而淳祐  
淳祐而寶祐十餘年間無非持循此道之歲月陛下處此  
也庭燎未揮臣知其宵衣以待日中至是臣知其玉食弗  
遑夜漏已下臣知其丙枕無寐聖人之運亦可謂不息矣  
然既往之不息者易方來之不息者難久而不息者易愈  
久而愈不息者難所臨大庭百辟星布陛下之心此時固

不息矣暗室屋漏之隱試一警省則亦能不息否乎日御  
經筵學士雲集陛下之心此時固不息矣宦官女子之近  
試一循察則亦能不息否乎不息於外者固不能保其不  
息於內不息於此者固不能保其不息於彼乍勤乍怠乍  
作乍輟則不息之純心間矣如此則陛下雖欲久則證臣  
知中庸九經之治未可以朝夕見也雖欲通則久則繫  
辭十三卦之功未可以歲月計也淵蝓蠖濩之中虛明應  
物之地此全在陛下自斟酌自執持頃刻之力不繼則懲  
久之功俱廢矣可不戒哉可不懼哉陛下之所以策臣者  
悉矣臣之所以忠於陛下者亦既畧陳於前矣而陛下策

之端然其變曰子大夫熱之復之勿激勿泛以副朕詳延之



之篇終復曰子大夫熟之復之勿激勿泛以副朕詳延之  
意臣伏讀聖策至此陛下所謂詳延之意蓋可識已夫陛  
下自即位以來未嘗以直言罪人不惟不罪之以直言而  
且導之以直言臣等嘗恨無由以至天子之庭以吐其素  
所蓄積幸見錄於有司得以借玉階方寸地此正臣等披  
露肺肝之日也方將明日張膽蹇蹇諤言天下事陛下  
乃戒之以勿激勿泛夫泛固不切矣若夫激者忠之所發  
也陛下胡併與激者之言而厭之邪厭激者之言則是將  
胥臣等而爲容容唯唯之歸邪然則臣將爲激者歟將爲  
泛者歟抑將遷就陛下之說而姑爲不激不泛者歟雖然

奉對大庭而不激不泛者固有之矣臣於漢得一人焉曰董仲舒方武帝之策仲舒也慨然以欲聞大道之要爲問帝之求道其心蓋甚銳矣然道以大言帝將求之虛無渺冥之鄉也使仲舒於此過言之則激淺言之則泛仲舒不激不泛得一說曰正心武帝方將求之虛無渺冥之鄉仲舒乃告之以真實淺近之理茲陛下所謂切至之論也柰何武帝自恃其區區英明之資超備之識謂其自足以凌跨六合籠駕八表而顧如此語忽焉仲舒以江都去而武帝所與論道者他人矣臣固嘗爲武帝惜也堂堂天朝固非漢比而臣之賢亦萬不及仲舒然亦不敢激不敢泛

切於聖問之所謂道者而得二說焉以爲陛下獻陛下試  
采覽焉一曰重宰相以開公道之門臣聞公道在天地間  
不可一日壅闕所以昭蘇而滌決之者宰相責也然扶公  
道者宰相之責而主公道者天子之事天子而侵宰相之  
權則公道已矣三省樞密謂之朝廷天子所與謀大政出  
大令之地也政令不出於中書昔人謂之斜封墨勅非盛  
世事國初三省紀綱甚正中書造命門下審覆尚書奉行  
宮府之事無一不統於宰相是以李沆猶得以焚立妃之  
詔王旦猶得以沮節度之除韓琦猶得出空頭勅以逐內  
侍杜衍猶得封還內降以裁僥倖蓋宰相之權尊則公道

始有所依而立也今陛下之所以爲公道計者非不悉矣以寅緣戒外戚是以公道責外戚也以裁判戒內司是以公道責內司也以舍法用例戒群臣是以公道責外廷也雷霆發蔀星日燭幽天下於此咸服陛下之明然或謂比年以來大庭除授於義有所未安於法有所未便者悉以聖旨行之不惟諸司陞補上瀆宸奎而統師躡級閣職超遷亦以寅緣而得恩澤矣不惟姦賊湔洗上勞渙汗而選人通籍姦胥追刑亦以鑽刺而拜寵命矣甚至閭閻瑣屑之鬪訟皂隸猥賤之干求悉達內庭盡由中降此何等蠹事而陛下以身親之大臣幾於爲奉承風旨之官三省

幾於爲奉行文書之府臣恐天下公道自此壅矣景祐間  
罷內降凡詔令皆由中書樞密院仁祖之所以主張公道  
者如此今進言者猶以事當問出睿斷爲說嗚呼此亦韓  
絳告仁祖之辭也朕固不憚自有處分不如先盡大臣之  
慮而行之仁祖之所以諭絳者何說也柰何復以絳之說  
啓人主以奪中書之權是何心哉宣靖間創御筆之令蔡  
京坐東廊專以奉行御筆爲職其後童貫梁師成用事而  
天地爲之分裂者數世是可鑒矣臣願陛下重宰相之權  
正中書之體凡內批必經由中書樞密院如先朝故事則  
天下幸甚宗社幸甚二曰收君子以壽直道之脉臣聞直

道在天地間不可一日頽靡所以光明而張主之者君子  
責也然扶直道者君子之責而主直道者人君之事人君  
而至於沮君子之氣則直道已矣夫不直則道不見君子  
者直道之倡也直道一倡於君子昔人謂之鳳鳴朝陽以  
爲清朝賀國朝君子氣節大振有魚頭參政有鶻擊臺諫  
有鐵面御史軍國之事無一不得言於君子是以司馬光  
猶得以殛守忠之姦劉摯猶得以折李憲之橫范祖禹猶  
得以罪宋用臣張震猶得以擊龍大淵曾覲蓋君子之氣  
伸則直道始有所附而行也今陛下之所以爲直道計者  
非不至矣月有供課是以直道望諫官也日有輪劄是以

直道望諫官也日有輪劄是以直道望

直道望廷臣也有轉對有請對有非時召對是以直道望  
公卿百執事也江海納汙山藪藏疾天下於此咸服陛下  
之量然或謂比年以來外廷議論於已有所未協於情有  
所未忍者悉以聖意斷之不惟言及乘輿上勤節貼而小  
小予奪小小廢置亦且寢罷不報矣不惟事關廊廟上煩  
調停而小小抨彈小小糾劾亦且宣諭不已矣甚者意涉  
區區之貂璫論侵瑣瑣之姻婭不恤公議反出諫臣此何  
等狐鼠輩而陛下以身庇之御史至於來和事之譏臺吏  
至於重訖了之報臣恐天下之直道自此沮矣康定間歐  
陽脩以言事出未幾即召以諫院至和問唐介以言事貶

未幾即除以諫官仁祖之所以主直道者如此今進言者  
猶以臺諫之勢日橫爲疑嗚呼茲非富弼忠於仁祖之意  
也弼傾身下士寧以宰相受臺諫風旨弼之自處何如也  
柰何不知弼之意反啓人君以厭君子之言是何心哉元  
符間置看詳理訴所而士大夫得罪者八百餘家其後鄒  
浩陳瓘去國無一人敢爲天下伸一喙者是可鑒已臣願  
陛下壯正人之氣養公論之鋒凡以直言去者悉召之于  
霜臺烏府中如先朝故事則天下幸甚宗社幸甚蓋大道  
之行天下爲公周道如砥其直如矢自古帝王行道者無  
先於此也臣來自山林有懷欲吐陛下悵然疑吾道之迂



遠且慨論乎古今功化之淺深證效之遲速而若有大不滿於今日者臣則以爲非行道之罪也公道不在中書直道不在臺諫是以陛下行道用力處雖勞而未遽食道之報耳果使中書得以公道總政要臺諫得以直道糾官邪則陛下雖端冕凝旒於穆清之上所謂功化證效可以立見何至積三十餘年之工力而志勤道遠渺焉未有際邪臣始以不息二字爲陛下勉終以公道直道爲陛下獻陛下萬幾之暇儻於是而加三思則躋帝王軼漢唐由此其階也已臣賦性踈愚不識忌諱握筆至此不自知其言之過於激亦不自知其言之過於泛冒犯天威罪在不赦惟

陸下留神臣謹對

廷試前兩日先生苦河魚且不能食試之日丑寅間強起乘籃輿趨馳道外幾不能支吾至昕諸進士趨麗正門之旁門先生隨群擁併而入頂踵汗流頓覺蘇醒至殿廊恭受御策題就題命意文思湧泉運筆如飛所對且萬言未時已出矣或謂有神物者盪滌其中以吐其竒是豈偶然之故哉道體堂謹書

封事

己未上皇帝書

十一月吉日勅賜進士及第臣文天祥昧死百拜謹奉詔

獻書于皇帝陛下臣一介疎賤遭逢聖明猥以庸愚早膺

獻書于皇帝陛下臣一介踈賤遭逢聖明猥以庸愚早膺  
親擢世道悠悠風塵流靡臣於其間盖嘗感激奮發以爲  
由今之道無變今之俗一日有關於天下國家之故懼以  
無辱使令杜門四年讀禮之外盖未嘗一日不思以自效  
也乃夏五陛下臨軒策士偶垂記憶起臣於家居進臣於  
仕籍臣伏被宸命感激不自勝追惟蒙恩之初阻於朝謝  
北望天路輒奉表以聞伏蒙聖慈許臣詣拜闕下德至溼  
也臣就道以來不圖國事浸艱邊烽頓迫陛下引咎責躬  
改過更始召還舊德斥去元姦凡可以當天意回人心者  
無所不用其至伏惟陛下不自神聖猶親灑宸翰誕布詔

書庶幾中外臣庶危言極論以有補於今日之故陛下悔悟之意上通於天天下於此感服陛下之勇臣甫及趨謝闕庭兩讀綸音爲之哽咽下泣君臣之義與天地並立况臣蒙被厚恩非衆人比使於此時泯泯默默上負陛下內負帝衷尚何以飲食於載履間哉是用不避斧鉞輒奮愚衷條其說以獻惟陛下裁幸一曰簡文法以立事夫貴爲天子富有四海垂衣拱手以雍容於穆清之上至尊之體也不幸際時艱難兵革四起俯仰成敗呼吸變故此非用馬上治不濟今國勢搶攘固猶未至如馬上之急然寇入腹心事干宗社陛下爲皇皇拯救之謀不得不畧倣馬上

治之意今陛下焦勞於上兩府大臣黽勉於下君臣之

治之之意今陛下焦勞於上兩府大臣黽勉於下君臣之間不可謂非日計軍實而申做之者然尊卑闊絕禮節繁多陛下平旦視朝百官以次奉起居宰相播笏出奏從容不踰時軍國大事此雖陛下日夜與宰相汲汲而圖之猶懼不既謀王斷國之設施尊主庇民之蘊蓄豈能以頃刻交際而究竟之哉陛下退食之暇雖時出內批以與宰相商論宰相又時有奏報以出其建明然天下事得於面論者利害常決於一言筆墨所書或反覆數百言而不足事機交投寸陰可惜使宰相常有此等酬酢則一事之末固有費其日力者矣其於幾務豈不有所妨哉古者天子之

於大臣或賜坐或賜食或奏事至日昃或論事至夜分凡皆以通上下之情爲國家至計也賜茶之典五代時猶有之惟國初范質王溥頗存形迹此事遂廢陛下莫若稍復古初脫去邊幅於禁中擇一去處聚兩府大臣日與議軍國大事陛下賜之款密親是非可否於其間衆議惟允則三省畫時施行上下如一都俞嗑咈之間必將有超然度外之舉天下何事不可爲何難不可濟至於除授尤有關繫且如近者重臣建闡之事方帥海門隨遷建鄴甯鎮建鄴又進上饒布置變換如奕棋然卯詔辰行奔命不給大者措畫之如此小者遷徙之更多人無定志事無成謀當

此艱危豈不誤事繼自今始陛下宜與大臣熟議某人備

此艱危豈不誤事繼自今始陛下宜與大臣熟議某人備  
某職某人任某事人物權衡當而後用朝廷命令奠而後  
發如此則觀聽者不至皇惑驅馳者不至遲回人知其今  
出惟行則無輕朝廷之心士大夫知其可以展布四體則  
鞠躬盡瘁而無觀望其於國事厥非小補又如用一人也  
或出於陛下之拔擢或出於宰相之啓擬中書已費行移  
後省方及書讀或有不當又至繳駁比其不繳駁也則書  
黃徑下其人徑受命矣臺諫始從而有所指陳是致國論  
紛紜而內外職守遷移如傳舍施之平時雖有體統用之  
今日恐悞事機臣愚以爲陛下宜倣唐諫官隨宰相入閣

故事今給舍臺諫從兩府大臣日入禁中聚議其有不可  
應時論難不使退有後言如此則國事無聚訟之譏宸命  
無反汗之失事會無濡滯蹉跌之悔豈不簡便易行哉若  
夫中書乃王政之所由出宰相之重又天子之所與論道  
經邦而不屑其他者也今宰相來於倉卒之中而制千里  
之難立於敗壞之後而責一旦之功此雖敏手不能以大  
有爲湏是博采四方之謀旁盡天下之慮而後不僨於事  
側聞軍期文書填委叢積宰相以其開誠布公之歲月弊  
弊焉於調遣科降之間侍從近臣且日不暇相接矣諸葛  
亮以區區之蜀抗衡天下十分之九究其經濟大要則曰

集衆思廣忠益今衆思不暇集忠益不暇廣宰相不得已



集衆思廣忠益今衆思不暇集忠益不暇廣宰相不得已  
竭其一心役其兩耳目日與文書期會相尋於無窮此豈  
其才之不逮哉我朝三省之法繁密細碎其勢固至此也  
柳宗元有言失在於制不在於政爲今之計惟有重六部  
之權可以清中書之務今六部所司絕是簡省其間長貳  
常可缺貳莫若移尚書省六房隸之六部如吏部得受丞  
相除授之旨而行省劄兵部得稟樞密調遣之命而發符  
移其他事權一倣諸此而又多置兩府屬官如檢正都承  
之類使知蜀事者置一貳知淮事者置一貳知諸路事者  
置若干貳兩府日與其屬劇切講畫以治此寇而文書行

移不與焉如此則大臣有從容之暇可以日見百官以及  
四方賢俊酬應簡則聰明全心志壹則利害審塞禍亂之  
路開功名之門當自此始惟陛下思之二曰倣方鎮以建  
守今天下大患在於無兵而無兵之患以郡縣之制弊也  
祖宗矯唐末五代方鎮之弊立爲郡縣繁密之法使兵財  
盡關於上而守令不得以自專昔之擅制數州挾其力以  
爭衡上國者至此各拱手趨約束捲甲而藏之傳世彌久  
而天下無變然國勢由此浸弱而盜賊遂得恣睢於其間  
宣靖以來天下非無忠臣義士強兵猛將然各舉一州一  
縣之力以抗寇鋒是以折北不支而入於賊中興之臣識

循環救弊之法蓋有建爲方鎮之議者矣失此不圖因循

循環救弊之法蓋有建爲方鎮之議者矣失此不圖因循  
至今日削弱不振受病如前及今而不少變臣不知所以  
爲善後計矣今陛下命重臣建宣閫節制江東西諸州官  
民兵財盡從調遣廟謨淵深蓋已得方鎮大意矣然既有  
宣閫又有制司既有制置副使又有安撫副使事權俱重  
體統未明有如一項兵財宣閫方欲那移諸司又行差撥  
指揮之初各不相照承受之下將誰適從今日之事惟有  
畧倣方鎮遺規分地立守爲可以紓禍且如江西一路九  
江興國隆興與鄂爲鄰朝廷既傾國之力以赴之姑所不  
論惟寇之至湖南者已宿堂與此外八州其措置不容苟

簡八州之中廬陵宜春最當衝要虜之爲兵其法常有所  
避避入桂則出清湘避長沙則出衡陽今宜春見謂有兵惟  
廬陵猶此無備舍堅攻瑕棄實擊虛虜既以此爲得策則  
夫避宜春而趨廬陵其計將必出於此州縣之事力有限  
守令之權勢素微虜至一城則一城創殘至一邑則一邑  
蕩潰事勢至此非人之愆若不別立規模何由戡定禍亂  
臣愚以爲莫若立一鎮於吉而以建昌南安贛隸之立一  
鎮於袁而以臨江撫瑞隸之擇今世知兵而有望者各令  
以四州從事其四州官吏許以自辟見在任者或留或去  
惟帥府所爲去者令注別路差遣其四州財賦許以自用

自交事一日始其上供諸色窠名盡予帥府交事以前見未解數目亦許截留其四州軍兵見屬伍符者必寡弱而不振見行團結者必分散而不齊許於伍符團結之外別出措置收民丁以爲兵彼一州之緊急者得三州稍寬緩之力以爲之助三州之寬緩者得一州當其緊急而無後憂不出二三月如吉如素其氣勢當自不同做此而行之江東廣東無不可者夫郡縣方鎮之法其末皆有弊所貴乎聖人者惟能通變而推移之故郡縣所以矯方鎮之偏重方鎮所以救郡縣之積輕今郡縣之輕甚矣則夫立爲方鎮之法以少變其委瑣不足恃之勢真今日之第一義

也陛下一日出其度外之見不次拔數人之沈鷺英果者  
委以數鎮俾各爲國家當一面則郡縣之間文移不至於  
太密事權不至於太分兵財得以自由而不至於重遲而  
不易舉旬月之間天下雷動雲合響應影從驅寇出境外  
雖以得志中原可也尚何惴惴宗社之憂哉三曰就團結  
以抽兵抽兵之說臣前已闡其端而其節目未悉也請再  
陳之夫取兵於民周井田唐府兵之遺法也今使者四出  
分行營陣俾各處團結以自爲鄉井之衛疾行之中此亦  
庶幾善步者然而無益也近時朝廷以保伍爲意官府下  
其事里胥爲里胥者沿門而行執筆以抄其戶口曰官命

而各爲保伍也已而上其藉於官又從而聖通塗之壁取其甲分五五而書曰保伍如右所謂保伍者如此而已臣居廬陵往往有寇警則鄉里又起所謂義丁者一日隅總擊柝以告其一方曰寇至毋去諸而等各以某日聚某所習所以守望至其日也椎牛醜酒以待隨其所衣信其所持從而類編爲之伍一匹乎村墟井落之間翕然而聚忽然而散則義丁者又止如此而已今朝廷命使以團結州縣奉旨而行移計其規爲布置當有加密於臣所言者然某所若干人某所又若干人屬邑合狀帳申郡府郡府合狀帳申朝廷計其數目當自不少然其分也散而不一其合

也多而不精故當其分則鄉村無以通於鎮市鎮市無以通於城郭虜突如其來彼一方者力不敵勢不支老弱未及揀教閱未及施雖有金鼓旗幟之物而未知坐作進退之節也雖有城池山澤之險而未知備禦攻守之方也且民之聚也使之自峙其糧自備其飲食則有所不能仰於官則無以給也有以給則又不能久也臣故曰無益也夫前所謂或千人或數百人此隅總一日能辦也今建言者不察其聚之易而用之難增兵之有名而拒寇之無實乃欲視其團結之多寡升降其官賞以爲勸且意其一日之急或者可驅而他之賈誼有言皆非事實知治亂之體者

也陛下能委數州立一方鎮莫若俾爲帥者就團結之



也陛下忱能委數州立一方鎮莫若俾爲帥者就團結之  
中凡二十家取其一人以備軍籍一郡得二十萬家則可  
以得一萬精卒例而行之諸州則一鎮新兵當不下二三  
萬州郡見存之租賦可以備兵食見存之財利可以備軍  
需古人抽丁之法或取之三家或取之五家今官收其米  
以就爲養收其財以就爲用既食其力不當又重役其人  
惟於二十家取其一則衆輕而易舉州縣號召之無難數  
月之內其事必集爲帥者教習以致其精鼓舞以出其銳  
山川其便習也人情其稔熟也出入死生之相爲命也鋒  
鏑之交貌相識而聲相應也如此兵者一鎮得二三萬人

當凜凜然不下一敵國今諸路列鎮則精兵雖十餘萬可有也太祖皇帝南征北伐所至如破竹計其兵曾不滿二十萬使吾於諸閩之外別得十萬精兵則何向而不可哉或曰國家經常皆用供億州縣財賦各有窠名今上流之兵未解江淮之餽如故使移此事力以給方鎮之兵如諸閩何嗚呼擇害莫若輕擇利莫若重臣蓋籌之審矣夫京湖之路既梗則雖欲漕運而舟楫不能以前江廣之備既虛則雖有財賦而土地不能以自保與其束手無措以委輸於虜孰若變通盡利以庶幾虜之可逐也且夫江廣既全則吾之境內其惟正之供者尚多也陛下撫此厄運不

得不勉自節縮曲爲通融多方以濟諸閫之急支吾年時  
寇必就盡然後一正吾之郡縣一復吾之經常未晚也不  
然殆未知其所終惟陛下深思亟圖之四曰破資格以用  
人本朝用人專守資格祖宗之深意將以習天下之才世  
雖有賢明忠智之人英偉竒傑之士亦必踐馭之多涉歷  
之熟積勞持久而後得至於高位養成遠大之器消弭僥  
倖之風人才世道胥有利賴然其弊也有才者常以無資  
格而不得遷不肖者常以不礙資格法而至於大用天下  
卒有變不肖者當之而有才者拱手熟視夫是以常遺國  
家之憂臣嘗見數年以來邊陲之間偶缺一帥陛下徬徨

四顧弄印莫屬挨排應急不得已常取監司之風力者爲之趙魏老不可以爲滕薛大夫陛下非不知其然也他人資格或有未及而彼適可得之雖其才具容有不逮然猶意境外無事以幸其不至於敗缺比其敗缺則倉皇變易常至於失聲色而後已嗚呼此平世拘攣之弊也今天下事勢潰決已甚一有蹉跌事關存亡百夫不可輕擇將一壘不可輕畀守况其重者乎今自朝郎以上凡內之卿監侍從外之監司郡守紫朱其綬唱喝車蓋而出者不知幾人使其中果有非常之才堪任將帥則是望實既優資格又稱一日舉而置之萬夫百將之上誰曰不然然臣意陛

下之未有其人也則夫宗社安危之機不可輕決於庸人而有資格者之手世之能辦事者固多矣三辰不軌拔士爲相蠻夷猾夏拔卒爲將事固各論其時也今何如時尚拘拘孑孑於資格之末臣觀州縣之間凡察底小官馳騁於繁劇之會者蓋甚有之薦引之法浸弊於私而改官之格率爲勢要者所據孤寒之中獨無可任大事者乎三歲一貢士碌碌成事者衆而氣槩才識望于鄉里曾不得一名薦書抱膝隆中杖策軍門固皆逢掖章甫之流也夫今日之士他日之官也今日之小官他日之爲公卿者也天下有事凡能擔當開拓排難解紛惟其才耳固有明知其

人之有才而拘於資格之所不可則亦姑委棄之此豪傑之士所以痛心疾首於世變之會也陛下如建立方鎮收拾人才臣願明詔有司俾稍解繩墨以進英豪於資格之外重之以其任而輕授以官俟其有功則漸加其官而無易其位漢唐法度踈闊其一時人才常倜儻不羈本朝以道立國以儒立政則亦無取乎爾然至於今日事變叢生人物落落柰何不少變之哉至如諸州之義甲各有土豪諸峒之壯丁各有隅長彼其人望爲一州長雄其間盖有豪武特達之才可以備總統之任一曰舉之以爲百校之長則將帥由是其選也其穎異通敏者引之於帷幄樽俎

之密又從而拔其尤者委之以人民社稷之重則人才不可勝用也至如山巖之氓市井之靡刑餘之流盜賊之屬其膽勇力絕足以先登其智辯機警足以間諜使貪使愚使詐使勇則群策群力皆吾屈也昔之方鎮食其土地用其人民拊循其士大夫馳策其趺弛之士故雖以區區之地常足以與天下爭雄今雖未至於此然陛下髣髴而行之則吾規模意氣固已一變前日之弱矣惟陛下熟計之幸甚夫古之爲天下國家者常有敵國相持之憂然而立乎四戰之衝雖將衄兵潰屢起屢仆而其國終不可動由卓然有所立故也今陛下奮發神斷赫然悔悟所以洗舊

汙更宿弊如雷霆風雨交馳並至而不可禦陛下亦求所以爲自立矣而未得其方也自立之方臣前所獻之數條是已雖然臣意陛下未之能行則有說也何也悔悟之意未明也奸人當國指天下能言之士謂之好名譁競使好名譁競者常在朝廷則清議之福陛下必及受用事應不至今日惟浸潤膚受爲毒已深而後陛下之人才盡逐陛下今既悔悟矣然鋒車所召率未及前日擯棄流落之人或謂陛下猶有畏其不靖共之意夫今日之禍亂靖共之報也陛下猶有愛於貌爲靖共者邪此悔悟未明之一也三數年前縉紳之能出臆論事者既爲奸人所屏學校之士

其爲善已也託名學法重致意



猶叩闥疊疊不自已奸人疾其爲害已也託名學法重致意於禁上書之一條而後陛下之言路盡塞陛下今既悔悟矣然食肉之徒未有能出一語以救陵遲之禍惟學校不憚懇懇以爲言彼其所陳固有未盡切實者陛下何不擇其善者而施行歟此悔悟未明之一也今有人焉陷於酒色湛溺而不自知元氣日耗蝕於內容邪日衝擊於外四肢百骸幾至解体一日倏大悔悟自創其酒色之愆而使爲朋友僕御者各得以勤攻己之短其爲身謀幾晚矣然知湛溺之爲病而猶諱其所從來則是病根固在也人非不知愛身彼諱病根而不肯決去者說其小而忘其大也

陞下所以救社稷重於救身則夫病根所在何所顧惜而  
不之去歟高宗皇帝以麥飯豆粥之苦植立東南百四十  
年太平之基陛下嗣無疆大歷服所以撫摩愛養培億萬  
年丕天之休加用力焉不幸比者中外怨叛吾之赤子自  
延寇入室謀危國家蓋至今日遠近爲之荷擔宗社幾於  
綴旒天下之人追咎其失以爲聚斂之過而聚斂之事通  
國憤然怒罵以爲倡於陛下左右之人夫此一人者竊弄  
威權上累聖德其凶燄威惡蠹國害民者臣不能具數獨  
其攘臂聚斂招集奸凶爲陛下失民失土以貽宗社不測  
之憂者其罪莫甚焉趙簡子命尹鐸爲晉陽尹鐸曰繭絲

乎保障乎簡子曰保障哉古之爲天下計者不屑於其小  
而惟遠者是圖不快於目前之求而常恐其一朝之患故  
雖簡子區區之大夫尹鐸區區之小吏其所規爲猶及於  
此國家之大不可以田舍翁自爲也後之人君思以富雄  
天下固有時出其聚斂之術然猶繭絲自繭絲保障自保  
障何物刑餘爲謀不減率天下以共向繭絲之的而保障  
之地亦不得免焉繭絲之毒不可忍而後保障之禍不可  
爲陛下間者屢出內帑金帛分給諸司期有救於難然調  
度方殷兵革又不得息前日聚繭絲之得未什伯今日救  
保障之費蓋千萬億秭而未有已也嗚呼誰生厲階至今

爲梗向使此人者不以聚斂斷伐祖宗涵洪寬大之仁蠹  
賊陛下神明英武之德則必不妄籍民財以入脩內司必  
不豪奪民產以實御莊必不諧價西園以布中外貪酣之  
寵必不交通南牙以開朝廷污濁之門如此則奸人必不  
得竊據相位徧置私人如此則疆禦培克之流必不得齒  
於縉紳玷於節鉞如此則各郡有賢守各路有賢監司必  
不侵漁以交結比司剝割以應奉內獻民心必無變宗社  
必無危今朝廷知江閩虐取漁舟故吾人爲虜鄉導以至  
於此曾不知是數年間外之監司郡守求爲交結應奉而  
一切不卹以失吾民戴宋無二之心者所在有之江閩之

事偶著爾今論者追訟江闔之罪死有餘責則夫使士大夫買買焉爲聚歛重失人心激天下以各懷怨叛如臣所指之人者一死詎足道哉且夫奸人之入相也使非此入者與之相爲表裏以揜陛下之聰明密爲游揚以開陛下之信用則賢者必不以好名中傷言者必不以譁競逐去學校之持公論者必不以諠橫得禍士大夫之秉直節者必不以貪賊加罪朝廷清一言路光明邪人何自而赫張民瘼何自而壅隔人離而陛下何以不覺寇至而陛下何以不知彼其依憑陛下恩寵以爲奸人奧主故顛倒宇宙濁亂世界而得以無忌憚使陛下今日訟過於天地負媿

於祖宗結怨於人民受侮於夷狄則豈獨一奸人爲之哉  
原情定罪莫重於與主而奸人次之莊周曰兵莫潛於志  
鏌鋣爲下言刺人而殺之不在於手而在於心不在於鋒  
而在所以用其鋒者奸人則鏌鋣也與主則志也方今國  
勢危疑人心杞捏陛下爲中國王則當守中國爲百姓父  
母則當衛百姓且夫三江五湖之險尚無恙也六軍百將  
之雄非小弱也陛下卧薪以厲其勤斫案以奮其勇天意  
悔禍人心敵愾寇逆死且在旦夕或謂其人者舖張驚憂  
以沮陛下攘寇之志處分脆弱將誤陛下爲去郟之行居  
前日則曰我能爲君充府庫以盜其權居今日則獻其小

心出其小有材使陛下意其緩急可恃以固其寵向非陛下參酌國論堅凝廟謨爲效死不去之計則一日嘗試其說六師一動變生無方臣恐京畿爲血爲肉者今已不可勝計矣小人誤國之心可勝誅哉臣愚以爲今日之事急矣不斬董宋臣以謝宗廟神靈以解中外怨怒以明陛下悔悟之實則中書之政必有所撓而不得行賢者之車必有所忌而不敢至都人之異議何從而消敵人之心膽何從而破將士忠義之氣何自激昂軍民感泣之淚何自奮發禍難之來未有卒平之日也千金之家得一僮奴稍足以稱其私雖害于而家未忍亟去况其人給事之歲月已

深乞憐之懇款已熟陛下性資仁厚亦豈忍遽甘心焉然宗社之事重左右之恩輕蠹民誤國之罪深承顏順色之愛浚伏惟陛下以宗廟社稷之故割去私愛勉從公議下臣此章付之有司暴其罪惡明正典刑傳首三軍以徇如此而天下不震動人心不喜悅將士不感泣而思奮虜寇不駭愕而謀還是人心天理可磨滅也是天經地義可漸盡也臣所不信臣嘗讀諸葛亮出師表輒捲卷哀憤悲其用心亮之言曰宮中府中俱爲一體陟罰臧否不宜異同若有作姦犯科及爲忠善者宜付有司論其刑賞以昭平明之治亮將獎率三軍北定中原攘除姦凶興復漢室其



於宮府之政宜若無與而獨區區以此爲先者良以社稷  
安危之權國家存亡之故不在於境外侵迫之寇而內之  
陰邪常執其機牙此亮之所以深權內外本末之理而先  
窒其禍亂之源也今臣上自朝廷下至州縣所以分畫其  
規模纖悉其經緯以上助尊夏攘夷之一畫者已畧備矣  
而臣獻其狂愚於末猶有感於亮之所言區區劣功何敢  
引亮爲證顧所以忠君愛國之心則亮之爲也臣非不知  
踈遠之人指陳無狀干犯天誅罪在不赦且使幸赦之不  
誅則左右之人仇疾臣言亦將不免然臣所以不顧危亡  
寧以身犯不測之鋒者義命之際臣固擇之精矣方今社

稷震動君父驚虞此所謂危急存亡之秋臣委質爲臣與  
國同休戚親見外患如火燎原而內寇又復植根固流波  
湧則禍難無涯臣死亡正自無日與休迫於權勢之威憂  
疑於一己之禍噤口結舌以坐待國家之難而後死孰若  
犯死一言感悟天聽如陛下以爲狂妄而誅之臣固已自  
分一死萬一陛下察臣之忠行臣之言以幸宗社則臣與  
國家同享其休榮等死之中又有生路此臣所以齎咨涕  
洟望闕懇悃而不能自己也臣冒瀆天威殞越震懼謹席  
藁私室以俟威命之下臣無任瞻天望聖激切屏營之至  
不備臣某昧死百拜上

此先生開慶己未伏闕書也先生丙辰狀元及第乃穆陵親擢舊例三魁唱名罷賜袍笏謝恩入幕賜御饌進謝恩詩出賜席帽於闕門外上馬迎入期集所者又名狀元局官給錢物供張皂隸等於此所聚同年待賓客刊題名小錄賜聞喜宴進謝宴詩如此者一月然後率榜下士詣闕門謝恩謂之門謝門謝後命之初階內狀元授承事郎僉書某軍節度判官廳公事至後一科放進士榜則前一科狀元召入爲祕書省正字名曰對花召此舊例也先生入期集所數日嚴侍有疾即謁告還邸侍藥未幾乃有失怙之變即持服扶柩歸里服除閉

門度日後一科當對召日始除僉書寧海軍節度判官  
廳公事蓋先生未除官而即持服故除初階先生上請  
未敢受官乞行門謝禮奉旨允已未冬造朝門謝適有  
江上之警應求言詔上此書不報而歸未幾又除僉書  
鎮南軍節度判官廳公事先生上請乞奉宮觀香火以  
安分守除中管建昌軍仙都觀未幾除祕書省正字誥  
辭云倫魁登瀛故事也然始進大率以虛名既久乃知  
其實踐爾則異是初以遠士奉董生之對繼以卑官上  
梅福之書天下誦其言高其風知爾素志不在溫飽麟  
臺之召其來何遲語有云見大名難又云保晚節難爾

其厚養而審發之使輿論翕然曰朕所親擢敢言之士  
可陞校書郎又陞著作佐郎兼景獻太子府教授值巨  
閣董宋臣再出用事於是上章極論遂出知瑞州此章  
見于後今畧叙其槩云道體堂謹書

癸亥上皇帝書

七月吉日具位臣文天祥謹昧死百拜獻書于皇帝陛下  
臣畎畝末學天賦樸忠遭逢聖明早塵親擢已未之夏陛  
下廷策多士記憶微臣俾佐京兆尹幕時臣不敢拜恩乞  
行進士門謝旨令赴闕其冬實來行禮適值寇難方殷江  
上勝負未決而全永衡且破于時京師之勢危如綴旒上

下皇皇傳誦遷幸臣得之目擊忱恐六師以一朝而動京社之事關係不細采之公論則謂寇禍起於儉壬之聚斂而儉壬用事則主於董宋臣至於遷幸一事宋臣張皇處分尤駭觀聽事勢至此死且無日臣忠憤激發叩闈上疏乞以宋臣尸諸市曹以謝生靈荼毒之苦指陳觸忤自分誅斥出關待罪不報亟歸山林側聽聖裁臣章雖不付出施行而竟亦不坐臣以罪非惟免於罪而已改命洪幕從欲與祠又寵綏之臣嘗以爲區區父母之身既委而徇國矣陛下赦而不誅臣之再有此身是陛下賜之也感激奮發常恨未有一日荅天地之造前冬誤辱收召畀以館職

曾未幾時進之以著庭寵之以郎省臣之取數於明時者  
益以過多共惟聖德日新朝無闕事臣得從事鉛槧悉意  
科條以無忘靖共爾位之訓忱幸忱荷茲者倏讀報狀宋  
臣復授內省職事臣驚歎累日不遑寧處繼傳御批洵昇  
兼職且使之主管景獻太子府臣備員講授實維斯邇此  
人者乃爲之提綱當其覆出臣自揆以義且無面目以立朝  
况可與之聯事乎請命以去臣之分也然臣端居深念託  
故而去謂之潔身可也陛下未嘗拒言者言而當於可陛  
下未嘗不行臣不言而去則於事陛下之道爲有未盡是  
用不敢愛於言伏惟陛下鑒臣之衷而幸聽焉臣伏讀國

史竊見孝宗皇帝所以待贊御者終始之際恩威甚明臣嘗以爲自古人主寬仁莫如孝宗英斷亦莫如孝宗方曾覲龍大淵輩用事周必大言之龔茂良言之劉度言之鄭鑑素樞言之言者日以盛而孝宗假以恩寵未嘗爲之少衰孝宗豈弗諫者哉聖心寬仁未忍驟有所加也比其招權弄勢日益翕赫小心謹畏之態昵昵於前者迄不能掩其陰私傾險之迹或以見踈死或以坐罪廢英斷如此豈以寬仁而遂失之姑息哉開國承家小人勿用聖子神孫一守是法共惟皇帝陛下以聰明操制萬幾以神武經緯六合四十年間凡經幾大禍亂幾大驚危絃重新整頓功



業逐日以新聲名隨風而流尚論聖德三代以下之英主  
未能或之先也神明之下侍御僕從罔匪正人旦夕承弼  
厥辟固其所也惟是宋臣兇驚慘毒不可嚮邇陛下曩以  
其小有才而假借之小人不足大受倚恃權勢無所不至  
戊午已未間天下指目共欲甘心臣冒死先爲陛下言之  
陛下於此時猶有徘徊顧惜之意未即加罪也而縉紳學  
校交䟽其惡伏闕投匭殆無虛日陛下始豁然大悟奪其  
大阿屏置畿郡中外鼓舞歌誦盛德臣妄謂陛下之寬仁  
全似孝宗陛下之英斷亦全似孝宗漢家自有制度固應  
如是詩云維其有之是以似之雖然陛下稟天地冲和之

全氣接帝王忠厚之上傳寬仁英斷雖並行而不相悖二者分數寬仁較多是以如此人者遂得以生全於覆載之內尋醫之旨未幾朝請之命復下今者又使之內居要地日覲宸光惟至聖爲能寬裕有容有如此者然臣嘗聞之惟仁者能好人能惡人蓋仁則無私無私故能好能惡聖人豈專以博愛爲仁哉漢唐宦官之禍其後至於濫觴而不可救推原其初則起於時君一念之不忍是故古人之防微杜漸不敢忽也語曰往者不可諫來者猶可追宋臣前此誤國之罪陛下既赦之而勿問矣臣何敢追尤往事上瀆聖聰獨爲方來計則嫫緇之憂不能忘情焉夫以陛

下聖明在上孤雛腐鼠亦何敢晝舞夜號少作喘息其人  
心性殘忍群不肖所宗竊恐復用之後勢談肆張植根既  
深傳種益廣末流之禍莫知所屆近者陛下親製十四規  
丕哉聖謨爲萬世計甚悉有如此事獨可以爲小故無與  
於貽謀而闕畧之哉宋臣之爲人臣實踈遠亦安能以盡  
知之惟是天下之惡名萃諸其身京國閭巷無小無大輒  
以董閻羅呼之陛下之左右使令亦衆矣此名不歸之他  
人而惟此一人是歸則豈不召而自至也哉陛下母以其  
退然謹愿而謂其未必怙威生事也母以其甘言卑詞而  
謂人言爲已甚也千金之家強奴悍僕恣橫閭里至其服

役於主人之前固亦未嘗不小廉曲謹而可信也此事雖小可以喻大陛下儻察及此則亦何愛於此一人而閔惜英斷以重違天下之心哉伏望陛下稍抑聖情俯從公議縱未忍論其平生之惡以寘之罪亦宜收回成命別選純謹者而改畀之失一兵得一兵於國家事夫亦何損于以厭人心之公于以示來世之法于以防天下之禍於未然今聞令望施于無疆臣子之願莫大於此臣實何人輒上封章以仰及於萬乘之所親信蚍蜉撼木自速齏粉可謂愚甚然臣方備位中朝使其以厚祿糊口坐取遷擢豈不得計而臣子所以事君正義謂何世道升降之大幾國家

利害之大故柰何坐而視之噤不發一語上負天子下負  
所學貽無窮羞此臣所以不敢強顏以留亦不敢詭辭以  
去忘其嬰鱗不測之危以冀陛下萬一聽而信之臣言得  
行宗社之利也臣之榮也如臣之積忱未足以仰動天聽  
坐受斧鉞九隕無悔謹杜門席藁以聽威命之下臣無任  
望闕瞻天激切屏營之至不備臣昧死百拜

輪對劄子

臣早以書生遭遇先皇帝親擢事先皇帝垂十年恨無消  
埃補報天地陛下龍飛繼運移忠以事聖明未肩乃心臨  
鑒在上比者臣來自外藩待罪戎監陛下親御宸墨進之

經筵臣學殖凋蕪循墻無路自入侍墮屢切見天顏粹穆  
聖性謙虛雖如草茅之愚時賜訪問臣感激殊遇亦既得  
以悉數於前矣猥當轉對伏念臣職在講讀今日聖學關  
天下治忽不細輒因封事畢吐其衷臣聞聖人之作經也  
本以該天下無窮之理而常足以擬天下無窮之變天地  
無倪陰陽無始人情無極世故無涯千萬世在後聖人亦  
安能預窺逆觀事事而計之物物而察之然後世興衰治  
亂之故往往皆六經之所已有凡六經垂監戒以爲不可  
者小犯之則闕安危大犯之則決存亡如赴水火之必斃  
如食堇葛之必毒是何哉聖人知有理而已合於理者昌

違於理者僵所貴乎帝王之學惟能不悖乎六經無蹈乎其  
大戒而已嗚呼聖人所以爲萬世慮者豈不甚智所以爲  
萬世戒者豈不甚仁矣哉書曰民可近不可下予視天  
下愚夫愚婦一能勝予而後世猶有以民爲黔首以覆其  
宗爲天下笑者書曰內作色荒外作禽荒詩曰亂匪降自  
天生自婦人而後世猶有昭陽華清霓裳羽衣以階漁陽  
之禍者書曰謹乃儉德惟懷末圖又曰不作無益害有益  
不貴異物賤用物而後世猶有葡萄天馬甲帳翠被以致  
四海蕭然者臣嘗歎夫自聖經以來時君不聞大道之要  
生人不被至治之澤秦至五季千數百年間犯六經之顯

戒者相望史冊聖人立爲大經大法以幸萬世藐然未有  
聞焉豈不惜哉惟皇上帝畀矜斯文孔孟微言至我朝周  
程張朱始大闡明如濛斯發先皇帝表章四書尊禮儒先  
爲往聖繼絕學爲萬世開太平穆考之廟稱爲理宗陛下  
親得精一之傳而日就月將緝熙于光明斯道斯民解后  
千載先皇帝欲爲唐虞三代之治殆留與陛下使了此事  
臣覩陛下自踐祚以來畏天尊祖親親仁民敬大臣體群  
臣尊其所聞行其所知何往非學今朝廷清明宮府齊一  
大法小廉罔越厥志不可謂不治矣然臣切恠去年寒燠  
失常四方或以旱告今年星文示變雨雹見妖近者積陰



爲寒皆名咎證漢人縱閉之學必謂一證主事臣不能曉  
此但即其影而想其形因其流而疑其源豈人所不知已  
所獨知之地陛下猶有當反之六經者乎陛下日御經筵  
正道正言嘗接于耳而又內庭不廢觀書傳曰多識前言  
往行以蓄其德陛下盖有之矣臣愚更願陛下虛心體認  
切已省察每誦一義善可以爲法即驗之身曰吾嘗有是  
乎無則勉之每說一事惡可以爲監即揣之心曰吾嘗有  
是乎有則改之言則慮其所終行則稽其所敝豈惟制治  
于未亂保邦于未危充道學之用經綸天下之大經範圍  
天地之化而不過行而帝行而王以卒先帝主張道統之

事業臣何幸身親見之哉書曰兢兢業業一日二日萬幾夫一日二日之間亦未至即有萬事然一事不謹則萬事之幾自此而兆故撥亂本塞禍源無一息不當用功兢兢業業所謂必有事焉者也惟陛下留神

內制

初進御筆

為馬丞相趙僉書上奏留平章

書曰三人占則從二人之言蓋占取其同自二人之同推之卿士庶民無往不同者師相欲去二府以為不可去是千萬人皆以為不可去矣朕自師相有請寢食不為安朕必不能違眾心師相亦必不忍違朕心嗚呼尚鑒時忱未緩在位師相其聽之哉所請宜不允

又擬

周公相成王終身未嘗歸國孟子當齊世不合故致爲臣  
蓋常情以去就爲輕惟大臣以安危爲重苟利諸國皇恤  
其身若時元勳爲我師相先帝付託大義所存太母留行  
前言可覆胡爲以疾而欲告休惟醫藥所以輔精神惟安  
身所以保國家古者之賜几杖雖當七十而不得引年我  
朝之重辯章雖過九旬而尚使爲政勉釐重務勿困眇懷  
所請宜不允

此先生直翰林院時代言一二也留平章二批已進呈  
御前賈似道有聞嫌所擬無過褒之辭且怒不先呈已

諷諭別直院官改作進呈批出竟不用先生所擬先生  
即引先朝楊大年在翰林草詔以一字不合真宗聖意  
明且援唐故事學士作文書有所改爲不稱職當罷因  
亟求解職丐祠引去賈似道以漆木史作字至先生勉  
留大畧云直院援楊大年故事豈非亦有大年性氣邪  
如此者在先朝以爲異後來皆以爲常近日馮王二直  
院所擬未嘗不反覆更定既曰天子私人又豈不通商  
量只如每年春帖自有一等忌諱字面上每令似道諭  
詞臣再三改定諸公亦惟知謹承上意直院特未知之  
耳幸不必過爲突兀而有邀心至叩率幾台照先生貼

名繳還來，暫又上第二章力丐祠東，擔出國門而臺疏。  
罷命出矣。先生有詩曰：當年祇爲青山誤，直草君王一  
詔歸。是也。道體堂謹書。

擬冊立皇太子文

皇帝若曰：朕弗克于德，嗣先人宅丕后三十有七年。夙興  
夜寐，怵惕惟厲，懼無以追配于前猷。自底不類，迺季秋將  
有事明堂，思惟皇天全付于有家，繼繼承承於千萬年。祖  
宗在天，眷相惟茲。蔽自朕志，貽厥孫謀。于一人有辭郊廟  
神祇，祖考將安樂之。皇帝曰：猷具官皇子某爾，忠孝豈弟  
少如夙成。朕用䟽爾王封，行爾賦畝，欽迺服。命克懋厥德。

惟爾休昭事有嚴俾爾圭鬯薄海內外罔不咸一其冊爲  
皇太子改名某嗚呼厥惟我前人造天丕基創守惟艱哉  
天難謀命靡常民罔常懷懷于有仁戒之哉爾惟親正人  
學于古訓罔遊于盤罔淫于逸罔以非道孫志罔以古之  
人無聞知尊德崇道由仁義行乃若時守宗廟社稷以爲  
祭主天地神人無疆惟休朕不失爲知子爾亦有令名於  
戲欽哉

文山先生全集卷之三終

文山先生全集卷之四

文集

表牋

門謝表

臣某言伏準省劄五月二十八日三省同奉聖旨文天祥  
添差簽書寧海軍節度判官廳公事仍釐務臣以賜第之  
初未經門謝未敢祇拜劄命申乞指揮續準省札七月十  
一日三省同奉聖旨今朝謝訖之任臣謹遵奉旨揮詣闕  
庭朝謝者御大廷而發策式廣旁招奉清問以攄忠謨承  
親擢尚阻紫宸之謝遽叨黃紙之除曠世遭逢瞻天感激  
臣切以賓興下詔同天地宗祀之彝科舉取人代造化爵賢

之柄豈曰利人才之進取其間實天道之流行肆萬乘之  
臨軒受諸侯之貢士占小善者率以錄咸造在廷取一人  
焉拔其尤必有名世豈應庸瑣可在蒐羅臣稟質既凡聞  
道猶淺才非洛陽之年少偶玷薦書學非廣川之大儒遽  
塵舉首自叨異數亦既三年回思臚唱之蒙恩莫與鳥趨  
而奉表有懷就日無路賤天方徬徨於丘園乃寵綏其祿  
秩輒請展為臣之禮幸許脩詣闕之恭茲蓋伏遇皇帝陛  
下德體乾行道苻常久世更三紀遠追成周式化之風歲  
啓後庚近接藝祖開基之運凡際風雲之會咸依日月之  
光遂令一介之姓名亦被九重之記錄臣敢不誓堅素守



勉企前修自揆讀書非爲平生溫飽之計願言竭節用副  
上心忠孝之期臣無任瞻天望聖激切屏營之至謹奉表  
陳謝以聞

湖南提刑到任謝皇帝表

帝庭敷命昭闢四門天牧播刑誤頒一節申以端驅之旨  
疇茲已試之庸周際載馳漢條具布伏念臣本無他技惟  
有孤忠兩朝特達之知洊塵清要十載行藏之跡祗自悔  
尤雲雷之義方屯天地之心已復當元日達聰之始在皇  
華遣使之中聖恩靡許於祝釐臣職敢稽於行道瞻盖高  
而下耳冀用譽於折肱茲盖恭遇皇帝陛下道協重華仁

文獻通考卷之四  
周四表崇德廣業合乾轉坤翕之功折獄致刑得震動離  
明之用遂令承乏復忝司平臣敢不祇若咨詢對揚欽恤  
陳時臬事尚弘康乂之圖受王嘉師永迪明清之訓

謝皇太后表

司平楚甸命出嚴宸告至周原恩歸慈極敢敷睿訓仰謝  
徽音伏念臣一介寒微兩朝知遇傾葵向闕初無補於使  
令啜菽杜門祗自深於觀省當元日會同之始拜公朝技  
拭之仁言遣使臣往陳臬事華省端頒於越旨業祠竟秘  
於俞音勉臣子之驅馳見吏民而宣布茲蓋恭遇壽和聖  
福皇太后陛下心超有極道合無疆長信怡愉贊炎圖之

永皇太后陛下心超有極道合無疆長信怡愉替炎圖之  
昌運大任蕭穆開蒼籙之隆平宜擇攸司俾敬爾獄臣敢  
不丕承欽恤誕布慈仁乂我黎民尚想無刑之治于其王  
毋敢忘介福之元

謝皇后牋

君子審官道隆儷極皇華遣使命出治朝德意具宣忱辭  
告至伏念臣竦庸一介遭遇兩朝早綴班行嘗忝金科之  
屬繼乘使傳復塵繡指之行曲成每戴於釐明退食難外  
於吏議不圖元會復錫恩言杖拭起家徃陳時臬驅馳在  
道寅奉天威泣止攸司欽哉乃職茲蓋伏遇皇后殿下德  
侔坤地位正家人關雎之化既行用之天下象魏之法使

布正自王宮爰取踐更載叨詳讞臣敢不靈承欽恤祗若  
平反無刑以乂黎民誕敷聖化式敬以長王國永誦徽音

皇太子生日賀皇帝表

大夏長羸坤二爻之紀季千秋似續震一索之揆初瑞彩  
緣車歡顏卅辰恭惟皇帝陛下德流芑水業茂蘿圖壽富  
多男積善必有餘慶本支百世命吉在厥初生記甲觀之  
瑞分占乙禠之祚遠臣縻身軫軫戴目心星誦億子之宜  
君首歌周雅祝萬年之爲父更續唐詩

賀皇太后表

福于王母際南面之昌期天以神孫娛東朝之永日晝堂

瑞節長樂歡聲恭惟壽和聖福皇太后性蘊冲和仁培靜  
壽思齊所以聖也以御于邦螽斯宜爾孫兮克開厥後皇  
皇穆穆繼繼承承臣迹滯騏原心馳鳳闕本支百世播絲  
絃之聲詩怡愉萬年衍含飴之福慶

賀皇后牋

坤后廣生式協二爻之月震男揆度載逢一索之期慶衍  
蘿圖喜充椒掖恭惟皇后殿下道柔配地德厚承天以御  
于家爲今京室之婦則樂有子如古周南之風百世本支  
萬年福祿臣迹縻牡轡心賀燕謀占斯干之詩已符吉夢  
美思齊之德益嗣徽音

皇子進封左衛上將軍嘉國公賀皇帝表

乾父垂仁茂積蘿圖之慶震男鍾美肇基茅土之邦百世  
可知四方來賀洪惟昭代爰立親親粵有舊章禮優貴貴  
昉祥符之七載侈慶國之初封綺仗分班瑑珪䟽寵庸表  
人倫之厚適觀王室之疆式于今休監于成憲恭惟皇帝  
陛下福培周厚和緝堯雍寶曆無疆方萬年而受祐金枝  
有煇期億予以宜君錫以嘉名渙其大號地營東井詔爵  
五之最穹天拱北辰炳心三之相照克昌厥後長發其祥  
臣有蹇牡駢阻隨虎拜祉歌予施遙陳皇矣之詩道盡君  
嚴願贊家人之易

賀皇太后表

東朝保艾方隆堯母之仁西國分茅武篤文孫之慶兩宮  
喜色萬宇歡聲恭惟壽和聖福皇太后陛下德厚慈元神  
怡長樂尊之至也上承視膳之勤宜爾繩考下適含飴之  
趣瑤池日永玉葉春濃臣遠被繡衣踰瞻綵仗于其王母  
知介壽之來崇佑我後人碩丕圖之有衍

賀皇后牋

坤稱乎母儼家服於椒塗震索而男赫龍光於茅土長秋  
喜色方夏歡聲恭惟皇后殿下含弘承天博厚配地祥鍾  
長發熾商後於有娥音繼思齊培文昭於大姒圭瑒焜煌

於綺仗芾朱輝映於襦衣臣遠驟華原踰瞻藻殿想宜君  
之穆穆茂對王休侈多子之繩繩載歸后美

皇女進封同壽公主賀皇帝表

乾見大人道風隆於乾體巽爲長女命爰寵於巽申喜溢  
宮庭歡騰海宇竊惟興君之際必有積善之餘播在正風  
則曰王姬之美陳于小雅是爲女子之祥無非歌福祿之  
同于以表國家之盛恭惟皇帝陛下和順而理溫柔以容  
苞體深仁既茂絲瓜之昃岡陵厚積復培穠李之華始封  
爰遴於嘉名遐祉永齊於聖壽臣跡縻使事身隔賀班親  
愛如家遙贊人倫之厚肅雍迪教遙觀王道之成



賀皇太后表

周家福祿積由任姒之仁堯母聖神親覩娥英之慶宮闈  
盛典海宇歡聲恭惟壽和聖福皇太后陛下南極景光東  
朝恭貴有功寶祚既開聖子之傳流澤銀潢爰毓天孫之  
瑞贊初封於沁水同上壽於瑤池臣遠玷皇華踰瞻長樂  
怡愉太后諒承婉婉之娛雍肅玉姬益表儉慈之教

賀皇后殿

坤萬物之資生寶蕃慶積異一索之謂長昉對命申喜氣  
宮闈歡聲海宇恭惟皇后殿下關睢孝敬芣苢和平灼灼  
宜家夙範華桃之懿雍雍成德茂鍾稷李之英賁然錫沁

水之封展也同長秋之壽臣遠縻苞杞遙睇塗椒風以周  
南仰化原之洵美觀于堯女願毋道之浚明

知贛州到任謝皇帝表

九重選牧錫類天寬千里承流奉親地近昉共侯度丕戴  
王休伏念臣某才本空疎分安孤苦身逢盛代夙自厲於  
卅心家有重親晚相依於白髮頃叨漢傳徃即楚封何敬  
非刑粗殫審克不遑將毋私切懷歸嘗懇懇以陳情冀高  
高之欲從邇蒙異渥特畀近麾繼盼旨以趣征已鞠躬而  
祇上祿及一門之微賤恩同大造之生成茲蓋伏遇皇帝  
陛下以堯舜之資行曾閔之道嗣寧王之大歷甚我成功

奉太后之萬年與天齊壽遂使忝求芻之寄亦獲共啜菽  
之歡臣敢不老老及人親親爲政由家達國期興遜以興  
仁以子移臣寓爲忠於爲孝

謝皇太后表

東朝鴻慶介壽無疆南國虎符便親有命荷中宸之渙寵  
望慈極以飯忱伏念臣一介迂踈兩朝遭遇昔備殫於敷  
歷無以逾人頃間任於驅馳不遑將母惟內懷於烏哺遂  
上徹於蟻忱果分二水之麾爰易三湘之節惟壤地接故  
可以供菽水之職惟土風習故可以盡芻牧之心自省叨  
膺若爲報稱茲蓋恭遇壽和聖福皇太后陛下德光堯母

功配周姜壽錫萬年享怡愉之福化流四海推慈孝之仁  
遂令下吏之僥榮獲以邇封而就養臣敢不祇承德意誕  
布恩言服膺錫類之詩益崇美化拜手牧民之訓隄贅徽  
音

謝皇后牋

慈極承天恩深錫類廉車易地職重分符布聖德之中和  
便親闈之溫清伏念臣起繇孤遠積有迂踈骯髒半生於  
事君而何補驅馳近歲以將母而未能屬爲養以陳情荷  
畀矜而從欲三湘納節二水授麾回刺史之車庶乎爲子  
捧郡守之檄專以爲親僥冒實多糜捐曷稱茲蓋恭遇皇

后殿下道隆坤厚德配乾仁大雅思齊媚周姜而穆穆長  
秋備禮奉漢母以愉愉遂今踈遠之微臣亦效旨甘於便  
壘臣敢不恪恭侯度茂對王休崇關雎卷耳之風迪惟懿  
則篤南陔白華之行施及遐萌

壽崇節本州賀皇帝表

天子有親備四海九州之奉封人祝聖同萬年億載之期  
凡屬照臨舉同呼舞恭惟皇帝陛下剛建中正緝熙光明  
燭六合而耀八紘功參天地躋三皇而軼五帝道御家邦  
紹巍巍蕩蕩之勲盡尊尊親親之養怡愉誕節光大前聞  
臣獲布寬條幸逢盛際鸞鸞阻綴莫旅賀於東朝螻蟻傾

忱惟仰瞻於南極

賀皇太后表

於萬斯年慈宸有慶誕彌厥月祖佛同生旒冕敬共縉紳  
舞蹈恭惟壽和聖福皇太后陛下道超太始德厚重坤闢  
睢周南之風夙陶美化思齊文王之母懋著徽音袵衣初  
奏於薰絃宮珮畢朝於慈宸親下袞龍之拜載揚韶鳳之  
音呼萬歲者三歡騰朝野等百世而上福衍子孫臣叨守  
魚符莫陪鴛序我百而爾九十諒喜溢於舉觴心一而臣  
三千第神馳於拱極

賀皇后牋

太姒之嗣太任星重慈極長秋之朝長樂天介壽祺流慶  
九霄比隆千古恭惟皇后殿下明章德範陶冶化風大練  
厚繒訓四方之節儉宵衣旰食侑五位之勤勞肖似徽音  
婉愉誕序厚符坤地吉萃家人臣逖守遐邦忻逢華旦仰  
瞻帝闕莫陪振鷺之班下與邦民同被闕雝之化

壽崇節兵馬鈐轄司賀皇帝表

天子盡敬事親丕昭瑞節臣下歸美報上同祝脩齡覆載  
兩朝頌歌四洽恭惟皇帝陛下克勤克儉無怠無荒堯以  
是傳道莫高於虞舜文所以聖德益顯於大任有開麗水  
之祥適際瑤池之會臣屬縻戎鍵阻綴班聯北面而朝恍

天威之尺五南山之壽效臣子之呼三

賀皇太后表

金闕日長尊處宸闈之極玉卮春滿誕膺法駕之朝凡在  
式圖率均擊壤恭惟壽和聖福皇太后陛下心遊恬淡德  
著慈仁隆周召之風人倫既正養黃老之性毋道獨尊皇  
穹申方至之休壽命衍無疆之筭臣猥分郡組共貳戎韜  
迹遠觚稜帷幄逾瞻於長樂悅同葵藿笙璫第想於承華

賀皇后牋

坐於少廣慶慈極之誕彌朝于寢門助聖人之教愛宮庭  
溢喜宇宙同和恭惟皇后殿下瑞應倪天光昭遡日正始



基化歌二南采苻之詩視膳問安備六寢禘禴之禮協朱  
明之律呂鏘綵仗之珮環驪奉玉卮禮同黼袞臣濫紆州  
綬通領兵符聆舜樂之九成遙瞻南面效堯階之三祝竊  
比華封

乾會節本州賀皇帝表

一人天拱適符龍御之亨萬國雲從共慶虹流之瑞系隆  
宗社福被寰瀛恭惟皇帝陛下曰睿曰聰乃文乃武金甌  
有永紹寧人大寶之休翠躡早朝娛太后萬年之壽當嵩  
呼之華旦繼夢月之佳辰兩宮同時千載盛事臣猥叨分  
竹彌切傾葵奉玉卮之恭阻綴班於北闕通銀臺之奏但

文山全傳  
卷之四  
申頌於西崑

賀皇太后表

六龍御極增光長發之詩萬國同心推本思齊之聖驩騰  
宮壺和塞堪輿恭惟壽和聖福皇太后陛下曰希曰夷爰  
清爰靜以天下養備百祿之熾昌與元氣游葆六根之純  
粹海內樂唐虞之化宮中頌任姒之音臣叨預承流遙伸  
歸美冬溫夏清禮嚴東面之朝日升月常福等南山之祝

賀皇后牋

黼宸端臨交上華封之祝椒塗內助仰承京室之規喜溢  
六宮和薰八表恭惟皇后殿下靜專成性徽懿秉姿珥簪

進庭燎之箴雞鳴有度弓鞬奉高禋之祀燕翼發祥際上  
帝生商之辰懋塗山興夏之德仰占七政日月並明俯鑒  
四方岡陵齊壽臣分符江右化被周南首贊乾亨體天行  
之不息更祈坤載協地道之無疆

乾會節鈐司賀皇帝表

龍首庶物覩天德之照臨虎拜萬年對玉休而蹈厲堪輿  
協氣海宇頌聲恭惟皇帝陛下神聖整齊武文經緯諸福  
畢至一登再登三登我武維揚五伐六伐七伐虬渚載臨  
於盛旦鳳音遙想於明庭臣通領鈐符恪共官次葵傾觀  
闕阻陪就日之班花覆簪紳隄謝需雲之宴

賀皇太后表

天下傳歸於子降寶冊之鴻名聖人教愛以親上玉卮之  
粵壽非常之慶嘉頌攸同恭惟壽和聖福皇太后陛下冲  
澹順神儉慈乎化輔佐先帝夙殫卷耳之勤愉佚東朝允  
著思齊之聖昉前殿紀誕彌之旦正羣方傾就望之忱肆  
膺鳳輦之朝親下龍綃之拜臣屬縻戎鏃阻綴班行現五  
色之雲知獻占於太史舞兩階之羽諒增喜於慈顏

賀皇后牋

上萬歲之壽咸頌聖人形四方之風實基王化凡居持載  
罔不驩呼恭惟皇后殿下生稟靜柔安行雍肅躬河洲采

行之絜列聖顧歆翼寢門視膳之恭慈顏和懌合坤其順  
遡日而明欣聆嵩嶽之呼並受華封之祝臣俯共武服仰  
贊壽觴星之遠天之高陞莫瞻於九級漢之廣江之永詩  
但誦於二南

皇子賜名本州賀皇帝表

家有嚴君托中興之昌歷天以聖子作大國之宗藩喜溢  
宮闈慶關宗社恭惟皇帝陛下懋昭聖德厚正人倫保天  
命以宜君四方無侮貽孫謀而翼子百世可知爰錫嘉名  
載敷大號敬哉有土肇基二水之邦格于皇天式應三星  
之曜俾耆而艾長發其祥臣縻跡侯方傾心魏闕監王成

憲顧重謨烈之休啓我後人益壯本支之盛

賀皇太后表

東朝介福式彰母道之尊南國分封庸迪孫謀之吉兩宮  
交慶百世彌昌恭惟壽和聖福皇太后陛下長樂怡愉大  
庭游衍養以天下日永瑤池正于家人春生玉葉贊苴茅  
於涪水壯繇旄於宗藩臣逖在侯方阻瞻宸仗思齊所以  
聖遙頌徽音皇矣莫若周益隆世德

賀皇后殿

母資坤德之生椒塗襲慶男正家人之吉茅土分封宗社  
延洪宮闈闔懌恭惟皇后殿下承天光大法地靜專成美

延洪宮闈闈 澤恭惟皇帝殿下承天光大法地靜專成美  
化於周南言能逮下嗣徽音於京室于以御家属聖子之  
勝衣贊嚴君之錫爵臣遠縻外服阻造內班正風俗以厚  
倫永歌后德輔皇王之維辟丕俟孫謀

皇子賜名鈐司賀皇帝表

天佑我家篤生聖嗣國有鉅典肇建宗藩社稷靈長神人  
孚洽恭惟皇帝陛下禮行貴貴愛立親親撫寶曆之昌期  
萬年福祿演銀潢之慶澤百世本支爰重燕謀載頒鴻號  
于疆于理地營浯水之邦有翼有馮星拱周廬之衛克開  
厥後俾熾而昌臣遠繫戎韜愉瞻文石施于帝社德已動  
於監觀保我後生命更歌於壽考

賀皇太后表

堯母怡愉介于景福湯孫岐嶷錫以嘉名慶衍宗枋歡隆  
慈極恭惟壽和聖福皇太后陛下爰清爰靜曰希曰夷佐  
先帝之中興雞鳴有度膺嗣王之孝養燕翼成謀爰鍾受  
於綠車乃分符於赤社臣恪恭武服阻造王庭以御于家  
喻贊思齊之德克開厥後佇成皇武之功

賀皇后牋

坤稱乎母作德配天震索而男建邦有土慶成宗社喜溢  
宮庭恭惟皇后殿下芣苢和平關雎孝敬嗣母徽於京室  
在廟在宮明予道於家人正內正外歡動勝衣之拜光昭



在廟在宮明子道於家人正內正外歡動勝衣之拜光昭  
燾社之封臣共武有嚴稱班云逃風以周南之化諭贊爰  
斯烝哉豐水之謀適觀燕翼

皇帝登寶位本州賀皇帝表

天作之君表冠倫之大聖父傳於子昭立嫡之至公曆數  
維新神人胥慶恭惟皇帝陛下以周元子爲舜重華大德  
生知聰明以臨齊莊以敬一人有慶進退可度容止可觀  
積累厚而孫謀深謳歌同而神器定無爲而治有道之長  
臣叨領虎符踰瞻龍御建皇極而王天下幸際昌期開明  
堂而朝群臣聳觀初政

賀太皇太后表

肇聖德之龍飛運開昌曆垂孫謀之燕翼功出慈宸九廟  
尊安八紘抃蹈恭惟壽和聖福太皇太后陛下道光任姒  
行邁塗莘範肅東朝性適合飴之樂規重南面養親視膳  
之榮光昭嫡統之傳丕衍皇家之慶臣叨紆守綬阻遙賀  
班頌皇帝之萬年永言齊壽佑寧人之大歷尚克圖功

賀皇太后表

震出麗天重明繼序坤稱正位一統蒙休基祚斯皇幅員  
胥慶恭惟皇太后陛下輔佐先帝憂勤王家思媚周姜履  
肅雍於京室訓貽禹子服勤勞於塗山瑞昭南面之符光  
疊東朝之矩臣屬縻侯服隄企慈帷嫡統無疆已慶大橫

之兆嗣徽有秩尚稽小毖之謀

皇帝登寶位鈐司賀皇帝表

乘時御極宣日月之重光居嫡宅尊大春秋之一統幅員  
愛戴宗社安強恭惟皇帝陛下仁孝生知聰明時又踐寧  
王之丕祚大歷維新奉文母之徽音皇天有慶宜首正飛  
龍之御以上承翼燕之貽無疆維休有相之道臣濫巾戎  
韞阻遶朝班五百歲而生幸親見聖萬億年其永不替惟  
王

賀太皇太后表

兆協大橫運在當命之聖謀貽小毖功歸太上之慈嫡統

延洪皇圖鞏固恭惟壽和聖福太皇太后陛下躬基美化  
教闡徽音彤管光華配豐功於祖烈練衣朴素示懿訓於  
孫謀聿新歷服之傳式副簾帷之託臣司戎共貳望闕呼  
三度民近天子光忻逢昌曆太極爲元氣毋永迪初基

賀皇太后表

震主宅尊光紹寧王之命坤元居正適彰太妣之音一統  
親傳萬邦胥慶恭惟皇太后陛下功侔持載德備含弘風  
化二南衍傳家之忠厚本文百世肇繼序之聖明大春秋  
正嫡之書應日月重光之運臣僑兼鈐綬阻造軒帷在天  
利見大人已孚文命介福于其王毋長詠思齊

謝皇帝登極赦文表

日月重離開國家之休運雷雨作解溥天地之至仁萬邦  
咸休一人有慶恭惟皇帝陛下堯文光宅舜德出寧神聖  
爲君丕受皇天之命春秋立嫡聿昭正統之宗爰肆肯於  
端門示湛恩於熙代臣猥分銅虎隄企金雞大人繼照四  
方聳觀初政皇極敷錫五福第奉寬書

太皇太后加尊號本州賀皇帝表

御丕圖於南面順應天人崇徽冊於東朝重增宗社億年  
縟典萬國懽心恭惟皇帝陛下皇極之宗人倫之至性同  
符於堯舜達孝升聞訓一本於姜任徽音有秩紹寧王之

明命彰祖后之尊稱臣分牧有嚴承休胥拊介福于王母  
難名太上之功肖德以神孫願共無疆之號

賀太皇太后表

鴻名揚厲用彰重慶之尊寵宸繼承懋舉盡倫之制明廷  
孚號寰宇傾心恭惟壽和聖福太皇太后陛下德備儉慈  
教脩愛敬佐我烈祖成天保之憂勤訓于神孫示思齊之  
雍肅粹美翟禕之服增華琬琰之章臣屬守銅符欣傳寶  
冊同御延和之殿誕頌前猷尊居慈福之宮永言至養

賀皇太后表

統繼堯天重華協德位隆文母太妣嗣音寰宇休明內庭

蕭穆恭惟皇太后陛下高配地功大補天輔先帝以重  
光憂勤夙至肇嗣王之丕緒福祿方來奉寶冊於重闈壽  
皇圖於覆載臣屬縻郡綬阻遙廷紳咸曰太皇已慶元和  
之壽願言帝母永肩長樂之名

太皇太后加尊號鈐司賀皇帝表

皇圖嗣慶著母道於重坤鉅冊稱尊告王庭而大渙宮闈  
增重宗社蒙休恭惟皇帝陛下德爲聖人孝治天下侍宣  
仁之聽斷元祐同符稟慈福之起居紹熙儷美播無爲之  
懿號隆太上之徽音臣猥介戎鈐聳觀國典思齊文母既  
彰有德之雍雍於赫湯孫願共厥聲之穆穆

文山全集  
卷之四  
十七  
賀太皇太后表

離日方升光傳國寶坤元重慶肇建鴻名福萃三宮歡騰  
八表恭惟壽和聖福太皇太后陛下佐佑皇祖怡愉東朝  
德配姜任植丕基於蒼籙功高馬鄧扶洪業於炎圖宜效  
美於思齊大歸尊於長樂臣偶叨戎轄阻綴朝班丕哉烈  
丕哉謨共侯嗣王之政得其名得其壽載揚太上之休

賀皇太后表

晉大號於慈闈位隆長樂紹丕基於萬世慶本慈元命肅  
治朝禮行廣內恭惟皇太后陛下頤神冲澹履行靜專美  
紹思齊宜毓文王之聖訓垂訪落實開成后之謀贊重慶



於御簾推有尊於臨制臣猥分戎輅踰聽恩綸望少廣之  
宸居莫班獸舞頌長秋之壽曆同播鴻名

皇太后加尊號本州賀皇帝表

嗣王受此丕基光膺明命文母介以繁祉祇奉嘉名典冊  
流輝幅員有慶恭惟皇帝陛下一人出震五位乘乾玉質  
金相嗣延洪之大曆寶禕刊翟奉雍肅之徽音光進瑤編  
重增鼎祚臣叨分虎壘隄望龍墀保佑恩深已際大明之  
運怡愉樂永更揚齊壽之休

賀太皇太后表

毓正神孫方布應門之詔位尊祖后復隆京室之稱重慶

萬年丕休四海恭惟壽和聖福太皇太后陛下性超太上  
德應黃中元祐太功法宣仁之鞠育紹熙新政燕慈福之  
起居宜旌坤極之嘉名式趾太宸之芳躅臣屬分俟服欽  
誦王綸天子必有所尊已光載籍聖德無加於孝長戴兩  
宮

賀皇太后表

坤稱正位訓迪嗣王渙號揚庭尊歸文母簾帷介福祉稷  
垂榮恭惟皇太后陛下德著憂勤躬行慈儉虞嬪觀于瀉  
泖密贊聖謨后稷生於姜嫄美鍾神胄晉長信尊尊之號  
嗣思齊秩秩之音臣忝守藩維阻趨軒陛得其名得其壽

幸同萬國之歡宜爾子宜爾孫永頌兩宮之慶

皇太后加尊號鈴司賀皇帝表

重明以繼大人瑤圖垂慶介福而于王母玉冊有光瑞溢  
簾帷重闈宗佑恭惟皇帝陛下敬仁成性曆數在躬惟后  
綏猷蹈堯舜之孝弟因親教愛奉任妣之肅雍宜申慈極  
之尊式表聖倫之至臣叨兼兵輅隄企陛簾替長信之徽  
稱已光漢制頌塗山之丕訓益大禹功

賀太皇太后表

嗣皇奉冊尊居長信之名祖后宣猷夙迪思齊之訓萬年  
集慶八表蒙休恭惟壽和聖福太皇太后陛下德邁維莘

道高于泐金車玉路備三世之典章寶翟珍禕示六宮之  
法度美慈宸之疊矩揚大號以同符臣燕領戎鈴竦聆郵  
縟德壽早朝之典已慶淳熙延和同御之功益歌元祐

賀皇太后表

文母克昌厥後光紹皇圖大德必得其名慶隆寶冊四方  
來賀百志惟熙恭惟皇太后陛下陰教齊家慈元正位推  
爲美化邁周召之二南著在徽音紹姜任之大雅宜膺渙  
號增重坤稱臣適貳韜鈴聳聆綸綍踐其位行其禮莫重  
尊親求厥寧觀厥成適追來孝

太行皇帝升遐本州慰皇帝表

堯父宅尊春秋鼎盛祀天告隊遠邇震驚降割非常銜哀  
罔極恭以大行皇帝神聖文武濬哲溫恭萬千歲怡愉恪  
盡東朝之養十一年寅畏適祗上帝之威期壽考之惟休  
俄憂勤而積疚詎圖大漸驟至遐征望欲斷於遺弓命忍  
傳於憑几恭惟皇帝陛下有仁有孝盡制盡倫克念先猷  
根聖人之至性誕承慈訓服天下之通喪願少揮於孝思  
以求綏於神器臣屬縻守紱哀捧告書莫伸奔問之恭徒  
切攀號之痛

慰太皇太后表

鷄鳴問寢方慈極之深居龍去遺弓忽皇輿之新陟宮闈

震悼海宇摧傷恭惟壽和聖福太皇太后陛下德備周姜  
道光堯母東朝垂訓曾不改於儉慈南面積憂遽忍違於  
溫清驟懼國疚諒切聖懷少寬憑几之思式副御簾之託

慰皇太后表

皇靈新陟變撫遺弓儷極末懷悲興捐玦六宮哀痛九宇  
摧傷恭惟皇太后陛下坤道宅中家人位正脫簪而諫期  
共濟於中興綴衣于庭恐遽聞于末命雖委裘之悲至切  
而定鼎之託方新願制蠱傷永綏敷遺

云云

大行皇帝升遐鈐司慰皇帝表

王宜日中方慶垂衣之治父有天下遽傳憑几之言宗社

憫凶幅負哀痛共以大行皇帝王道正直帝德簡寬奉長  
樂之清溫丕昭仁孝聽邇英之勸誦邇紹文明方嗣服於  
萬年胡委裘於一旦烏號罔極龍御何追共惟皇帝陛下  
聖德升聞孝思永慕重華協帝方遏密於八音冢宰總官  
將諒陰於三祀願少紓於聖抱以弘濟於皇圖臣逖領戎  
昭哀傳國疚阻伸奔問惟重摧傷

云云

### 慰太皇太后表

嚴宸居正痛晏駕之奄聞慈極宅尊悵早朝之遽隔哀傳  
海宇悲結簾帷共惟壽和聖福太皇太后陛下德厚承天  
恩深與子夙行恭儉聖方頌於思齊晚享怡愉變忍聞於

顧命諒聖情之結戀鑒輿志之攀號願抑慈懷未謀孫翼

慰皇太后表

變興梧野九土烏號悲結椒塗六宮縞哭宅憂罔極降割  
何深臣共惟皇太后陛下志紹徽音躬行美化冬溫夏清  
佐孝養於東朝海潤星暉演慶源於中壺驟撫鼎湖之戚  
奚堪輿極之哀願抑慈懷聿扶新政

云云

百日慰皇帝表

烏號浸遠九土同悲駒隙易流十旬如隔撫時哀疚易月  
徬徨恭惟皇帝陛下曆數有歸羨墻如對雖擗踊哭泣曷  
勝父子之情而朝覲謳歌當慰臣民之望願節宅憂之制



益成繼志之圖臣承乏偏城阻趨嚴陛云云

慰太皇太后表

烏號銜恤悵再隔於月遊龍寢闕朝恍十周於日浹流光  
何速哀思欲摧恭惟壽和聖福太皇太后陛下宮壺宅尊  
簾帷託重雖道揚王命不勝慈極之懷然燕翼孫謀當念  
皇圖之本碩體臣民之戴少寬朝夕之思云云

慰皇太后表

雲升梧野頽隔千秋日短奠階駕言十浹委表禍迫捐珎  
哀深恭惟皇太后陛下教盡人倫慶隆母道雖易月以日  
難窮伉儷之悲然薦子於天正重攜持之託願俯從於中

制用式副於羣情 云云

期年慰皇帝表

追玉几之遺言制嚴易月服練冠於初祭哀重感時霜露  
深悲乾坤罔極恭惟皇帝陛下孝治天下統承先王雖見  
堯於墻克篤終身之慕然纘禹之服所期大器之安碩從  
禮制之宜少副輿情之望臣屬縻藩屏阻造闕庭 云云

慰太皇太后表

訓予命汝易月有嚴練而慨然周星何短哀承遺制痛結  
慈衷恭惟壽和聖福太皇太后陛下德紹宣仁功侔明肅  
天經地義扶嫡統於方新日邁月征悵宸旒之愈遠願勉

從於衆志姑少抑於至情

云云

### 慰皇太后表

悲捐玉玦痛極呼天祭服練冠制嚴易月乘雲浸遠濡露  
何堪恭惟皇太后陛下德佐先猷慶鍾神胄雖徬徨虞汭  
望欲斷於蒼梧然婉孌周姜任方隆於京室顧少寬於哀  
抱用丕贄於鴻圖

云云

### 再期慰皇帝表

龍湖未遠可傷易月之喪駒隙幾何已舉再期之制羨墻  
如在霜露孔哀恭惟皇帝陛下道盡人倫位隆世嫡雖終  
身慕父難窮至性之悲然億載怡親方豐慈顏之養顧重

文山全集 卷之四  
承休之託少寬追遠之懷臣踰綴蕃宣阻班軒陛 云云

慰太皇太后表

終天巨釁降割一朝易月通喪寓言再歲仙遊未遠慈抱  
難居恭惟壽和聖福太皇太后陛下功在先朝志勤內治  
雖變生憑几悵闕問於雞鳴然寄重垂簾方稽謀於燕翼  
願押無疆之恤益昌有大之休

慰皇太后表

望斷乘雲悵龍驂之浸逸制嚴易月恍鳳曆之再周几屬  
疇封式同追慕恭惟皇太后陛下承天功大與子仁深雖  
悼舜陟方不替蒼梧之望然闡周嗣歷方隆豐芑之休願

少抑於哀悰用未綴於神器

禫祭慰皇帝表

龍御何之方切綴衣之痛駒陰未遠已驚釋禫之期易月  
從宜感時增疚恭惟皇帝陛下恭默思道愛敬事親天作  
之君當周艱而卽命日致其孝將舜慕以終身願寬追遠  
之至情丕慰蒼生之顛望臣濫承郡綬阻綴朝班

云云

慰太皇太后表

袞衣萬歲痛隔終天禫服一朝權從易月感時憂戀率土  
盡傷恭惟壽和聖福太皇太后陛下德著寶禕功藏金匱  
撫鼎湖之龍去子保何追懷豐水之燕貽孫將有衍願副

普天之望式紓慈極之悲 云云

慰皇太后表

宮車輟駕沒遠翠華國典行權恍終素蹕託言釋禫胡忍  
免喪恭惟皇太后陛下夙著脫簪驟惟捐玦雖梧雲不返  
未為禕翟之傷然芑水方來共後簾帷之助願釋居諸之  
感俯從遐邇之情 云云

賀皇帝聽政表

思皇烈考誕受寶龜於穆嗣王甫放治象慈簾保佑熙政  
闡明恭惟皇帝陛下德實天生動為世則入于翼室稱元  
子以宅宗出自應門會諸侯而作誥欽奉怡愉之訓爰親

兢業之幾既兩宮垂拱以無爲宜四海謳歌而來覲臣屬  
縻郡國隄戀闕庭御延和殿之正朝頌光祖烈奉紫雲樓  
之明盟誓第守藩條

賀太皇太后同聽政表

綏壽而右文母高拱慈宸肖德而有神孫共臨幾政徽音  
洋溢光訓昭宣恭惟壽和聖福太皇太后陛下功邁塗山  
德高媯汭施于帝祉已深慶錫之源保我後生益行壽寧  
之福章憲垂簾於天聖宣仁稱制於延和紹昔大猷爲今  
懿範臣屬縻守綏欣聽俞綸太易太始太初莫測無爲之  
化四門四聰四目共觀有道之朝

文獻通考 卷之四 二十五  
天瑞節本州賀皇帝表

龍德御天重華于帝虹書流渚長發其祥萬姓驩呼三辰  
擁佑恭惟皇帝陛下聖德克肖天性自成光北斗之樞篤  
生黃帝美南山之壽誕命文王節屆千秋時維九月臣縻  
身侯度拜手王休三千臣同心永言華壽五百年生聖敬  
贊河清

賀太皇太后表

聖王垂拱萬年方開燕翼太皇怡愉億載親見虹流海宇  
春輝宮闈日永恭惟壽和聖福太皇太后陛下身基美化  
德著慈元正位而定家人功高配祖介福而來王母慶積



貽孫律協素商節書金錄臣濫膺藩屏阻賀簾帷假樂命  
之慶春秋之鼎盛思齊聖也同日月之離明

賀皇太后表

龍德方升祥書載震燕祿有慶福萃重坤旗翼光華幅員  
熙洽恭惟皇太后陛下道侔博厚德備仁明虞汭來嬪女  
于舜帝周京作配生此武王方觀日上於扶桑隨紀虹流  
於華渚臣濫叨一障逾企千班大域中王既祝華封之壽  
爲天下母願齊西極之年

天瑞節鈐司賀皇帝表

謳歌與子方開捧日之祥福祿宜王初紀流虹之慶光生

宗社歡溢堪輿恭惟皇帝陛下天德生知乾元首出載震  
載夙膺天地之珍符繼聖繼明正春秋之嫡統當瑤光之  
瑞節際金顛之昌辰臣分虎有嚴扈鯨欲舞呼玉卮之萬  
歲踰贊王休進金鑑之千秋嗣殫臣職

賀太皇太后表

萬壽齊天思齊以聖千秋紀日長發其祥廣宇休揚重闈  
慶洽恭惟壽和聖福太皇太后陛下以女堯舜爲今姒任  
有典有則之貽輔于皇祖立政立事之準訓乃文孫當月  
屆於素商喜節書於華渚臣猥塵戎轄阻賀宸闈請祝聖  
人既效堯封之職亦右文母載賡周頌之章

賀皇太后表

辛歲重光昔符夢日乾元首出今紀流虹歡溢華封慶歸  
長信恭惟皇太后陛下徽音大雅美化二南德配重華觀  
嬪于汭祥開長發立子生商扶暘谷之初并紀高禩之載  
誕臣領銜偏郡銜表明廷五百歲河清既覩聖人之出三  
千年桃實頽同王母之尊

太行皇帝謚號本州慰皇帝表

祀以配天致聖人之達孝廟可觀德彰烈考之隆名典冊  
千年宗祧九鼎恭以端文明武景孝皇帝光宅天下簡在  
帝心敬直義方煥經天而緯地事名物應昭脩政以攘夷

文山全集  
卷之四  
三十一  
大德大功立親立愛自生民而未有熙鴻號於無窮恭惟  
皇帝陛下離象重光乾龍首出聖畫倫王畫制始于家邦  
宗有德祖有功行其典禮式崇徽譽昭對皇靈臣叨領虎  
符欽傳駿命告神明頌盛德已觀國典之光薦郊廟揚洪  
休尚述侯邦之職

慰太皇太后表

居長樂之宮興懷鶴駕瞻顧成之廟肇錫鴻名大冊垂榮  
慈衷悼往恭惟壽和聖福太皇太后陛下以天下養與元  
氣游明肅臨朝親立仁皇之策宣仁在御永懷神考之思  
丕對皇靈昭升熙號臣屬縻俟紱阻慰震簾

云云

慰皇太后表

九疑陟遠莫返皇靈七廟升宗聿彰世德洪名有赫哀抱  
彌深恭惟皇太后陛下位正家人道隆坤母躬葛覃之節  
儉厥配有光秉清廟之肅雍于嬪增感於惟大冊肆對皇  
穹臣跡繫分符神馳望闕

云云

大行皇帝謚號鈴司慰皇帝表

翼室宅宗考先王之制禮觚壇告帝爲烈考以易名大冊  
適彰皇靈昭假共以端文明武景孝皇帝體元居正持盈  
守成端獨化之原文經天地明萬幾之理武定邦家景行  
有容孝思無極上可以配祖宗之德下可以垂子孫之休

恭惟皇帝陛下弼我不基鑒于成憲寧王克綏受命篤業  
忱辭嚴父莫大配天咨揚光訓奉徽稱於宗祀昭縉典於  
明時臣通領戎昭竦承帝號堯萬世如見莫名魏蕩之功  
周諸侯來朝第贊蕭雍之相

慰太皇太后表

盛德之祀百世肇建嘉名太皇之壽萬年興懷縉典慈宸  
惻楚穹覆鑒觀恭惟壽和聖福太皇太后陛下懿範兩朝  
仁恩四海爲元氣毋克篤貽孫育天下君恐聞祔禰哀時  
大號對越皇靈臣身貳戎鈴心懷國典

云云

慰皇太后表

大德得名尊歸昭考嗣王謀廟上奉徽音宗禰休揚宮闈  
愴極恭惟皇太后陛下儉昭練服中協黃裳嗣任德之肅  
雍思齊以聖名堯功之巍蕩煥有其章聿深羽翟之懷於  
赫觚壇之告臣猥兼戎轄諭贊邦彝

云云

冬至節本州慰皇帝表

一陽來復感駒隙之易流三祀諒陰悵烏號之浸邈愴深  
履屨悲著羨墻恭惟皇帝陛下清明在躬恭默思道水有  
源木有本方嚴祭祖之時霜既降露既濡不替思親之念  
少抑居諸之慟仰膺付託之隆臣逖守遐邦阻班嚴陛誦  
先王省方之戒願謹起居秉諸侯謀廟之忠聿懷奔走

文山全集  
卷之四  
三九  
慰太皇太后表

暖律吹噓感一陽之初復慈簾擁佑訓三祀之通喪痛在  
宮闈情均海宇恭惟壽和聖福太皇太后陛下徽音慈福  
懿範宣仁履轡迎長天休方至冕旒問寢子保奚追願少  
抑於慈懷以永綏於孫翼臣屬縻俟服隄企御闈云云

慰皇太后表

復陽在地氣應黃鐘坤德承天悲深素蹕六宮增疚萬宇  
永懷恭惟皇太后陛下長信宅尊思齊繼美手扶宮日坐  
占千歲之長日斷臺雲尚想九疑之遠碩紆哀於儷極以  
永翼於皇圖臣逃守江城隄瞻禁闕云云



啓殯慰皇帝表

三年諒陰不言悲深翼室七月同軌畢至告啓敢塗遠日  
戒嚴終天增慕恭惟皇帝陛下外勤謀廟內奉臨朝制爰  
舉於因山龍輜將駕情永懷於陟岵鳳紼奚追願寬劍舄  
之思益重基圖之託臣屬縻斗壘阻慰宸庭

云云

慰太皇太后表

居長樂之漢宮永懷鶴駕卜會稽之禹穴垂戒龍輜悲結  
慈闈痛均溥海恭惟壽和聖福太皇太后陛下憂勤德備  
擁佑功高百世可知首正貽孫之則七月而葬豈勝思子  
之懷願東望以節哀重外朝之同御臣身縻乘障跡阻趨

班云云

慰皇太后表

龍湖言遠椒掖永懷鳳翼飛嚴葢塗載闢六宮雨泣萬宇  
 雷哀恭惟皇太后陛下儷極勲高正家化洽撫軒皇之劍  
 舄祔賁橋山奉舜帝之衣裳思藏梧野尚軫乾坤之記願  
 紆朝夕之思臣身繫分符神馳攀紼

云云

發引慰皇帝表

鸞車既駕陟岵哀深龍匣畢塗崇丘制舉新宮永閔翼室  
 增傷恭惟皇帝陛下思道諒闇送終哀戚居喪讀葬禮不  
 愆復土之期因山不起墳尤切望陵之感莫少寬於孺慕

以丕重於宗祧臣縻跡俟藩傾心宸陛

云云

### 慰太皇太后表

日淪西極悵鶴駕之長遊天拱東朝痛龍湖之永閔重闈  
悲繫九土慕思恭惟太皇太后陛下福備怡愉功高擁佑  
撫綴衣於翼室億世貽孫念加斧於畢塗千秋望子願抑  
思齊之感益昌小苾之謀臣叨領偏城阻趨慈陛

云云

### 慰皇太后表

國謹重喪龍棺就殯禮襄大事鸞掖興懷海宇同哀山陵  
告備恭惟皇太后陛下憂勤孔夙哀感謹終媯汭居諸悵  
虞琴之已遠會稽咫尺望禹穴以奚追願紆既葬之悲式

文山全集  
卷之四  
相維新之治臣承流有守伸慰無從 云云

祔廟慰皇帝表

先帝之葬衣冠載虞神祐嗣王之奉宗廟丕祔皇靈昭穆  
用休典章備舉恭惟皇帝陛下以舜大孝居商諒陰如慕  
如疑既畢因山之禮以享以祀聿嚴升禩之恭勉承翼翼  
之容深抑瑩瑩之感臣屬縻牧訓阻奉駿奔 云云

慰太皇太后表

嗣王宅恤奉先祐以升宗聖母思齊感皇靈而悼往禮容  
有赫祀事孔明恭惟壽和聖福太皇太后陛下壽考維祺  
慈爲寶佑我烈祖有典則以貽子孫保予冲人脩宗廟

以序昭穆祔既行於未紹哀少釋於慈元臣叨綴蕃宣阻  
班奔走 云云

慰皇太后表

地隔丹洲畢舉九虞之祭天臨清廟昭升七世之宗縶主  
思皇椒闈若惕恭惟皇太后陛下性鍾慈儉德備憂勤嬪  
虞帝以曰欽陟方浸邈對文王之於穆率祀惟恭顙紆坤  
極之思益衍乾符之慶臣屬縻民牧莫效侯朝 云云

正旦慰皇帝表

王正書月景命維新靈德在天孝思罔極運開曆數哀動  
几筵恭惟皇帝陛下思道奉先與時更始王受同瑁祭不

替於元辰帝見美墻禮益嚴於上日願擗居諸之感不承  
擁佑之恩臣屬守偏城阻趨嚴陛

云云

### 慰太皇太后表

正月始和律更太簇昊天不弔痛在思齊曆數維新宮闈  
孔惻恭惟壽和聖福太皇太后陛下爲元氣毋與太極游  
孟春而戒適人撫時其邁上日而受文祖擁治方新願寬  
丕子之思益重神孫之託臣屬縻宣化阻慰履端

云云

### 慰皇太后表

羲日更新治開泰象虞雲浸遠悲在乾元駒隙易流烏號  
何及恭惟皇太后陛下光輔先帝敬授人時元會衣冠尚

想熙明之政月游劍鳥恐聞永紹之名願寬悼往之哀悰  
益撫履端之昌運臣屬縻一障阻慰三朝 云云

改元賀皇帝表

睿王會於三朝慶開景運皇天佑于一德治紀初元正朔  
肇新乾坤有造恭惟皇帝陛下春秋正始曆數在躬仰則  
定陵開三傳之丕祚近稽哲祖基七葉之昌期放鳳曆以  
改絃衍鴻圖而下鼎臣親逢變化適綴承流揚偉蹟鋪閱  
休恪共侯度撫太平應昌歷謹授人時

賀太皇太后表

天王一統爲元載敘正朔太皇萬年齊壽同御邦家日月

重明乾坤更始恭惟壽和聖福太皇太后陛下道符列祖  
功擁神孫乾德太平訓實承於昭憲元祐盛際政共聽於  
宣仁洵開更瑟之休實繫垂簾之盛臣叨承侯服丕奉慈  
宸基正始之風已新美化播思齊之頌永載徽音

賀皇太后表

春秋以一爲元曆開昌運關雎之化正始本在慈宸正朔  
更新國家胥慶恭惟皇太后陛下有娥長發太妣思齊齊  
壽以奉太皇德惟予肖受福而予王母祐自天申宜渙號  
以繫年示同文而更始臣猥乘一障丕戴三宮當昌歷應  
休期已供侯服綏眉壽介繁祉益贊母徽



曆日謝皇帝表

乘龍御以紀年一元正始詔虎城而頒朔千里承休敬授  
人時對揚王命恭惟皇帝陛下明哲作則曆數在躬欽若  
昊天熙春夏秋冬之績建用皇極協雨暘寒燠之疇乃誕  
布於成書以昭垂於新治臣蕃宣有恪播告惟恭錫厥庶  
民順中星而平秩佑于一德歌化日之舒長

謝太皇太后表

歲正孟陬一元改紀朝臨長樂萬國頌正春朔會同神人  
和洽恭惟壽和聖福太皇太后陛下怡愉萬歲擁佑一人  
肖德而有神孫光膺昌歷受福而于王母丕輯蕃禧載頌

協律之書式重垂簾之政臣欽承鳳紀誕布侯藩聽嘽竹  
之獻誕敷和氣獻蟠桃之頌益替壽眉

謝皇太后表

鳳曆頒春東朝介福虎城告朔北面承休歲定四時天佑  
一德恭惟皇太后陛下思齊肅穆少廣怡愉訓示塗山曆  
開禹子教行渭涘紀協周王春朔攸同乾坤交泰臣承流  
下障奉令孟陬協和萬邦第贊定時之績嚮用五福益陳  
曰壽之休

疏

壽崇節本州進功德疏

九龍吐水當摩卽產佛之辰萬歲呼嵩上大母延年之請  
敬憑二氏仰贊千齡壽和聖福皇太后陛下恭頌大安大  
榮至愉至佚慶雲五色現南極之祥光壽域八荒衍西池  
之長筭

鈐司進功德疏

三寶曰慈南極行太皇之福五兵不試西江陶聖化之風  
仗仙釋之殊因贊宮闈之丕慶壽和聖福皇太后陛下恭  
頌位隆少廣筭等崑丘仰大慈尊誕節正同於盛旦得無  
量壽長生永協於先天

乾會節本州進功德疏

聖瑞虹流開半千之休運官聯虎拜瞻尺五之清光霽玉  
翠之祥氛裊緇黃之妙果皇帝陛下恭頌駿聲克廣龍德  
方中地久天長壽命衍洪源之慶河清海晏皇圖鞏磐石  
之安

鈐司進功德疏

天臨寶位夙開繞電之符地領玉鈐載馨呼嵩之祝謹率  
兵戈之屬虔脩道梵之緣皇帝陛下恭頌玉燭四時金湯  
萬里元龜大貝梯航來川岳之珍歸馬放牛旗蓋壯東南  
之運

天瑞節本州進功德疏

飛龍在天大橫有兆流虹貫月景命維新演道梵之真銓  
崇聖明之瑞節皇帝陛下恭頌維天其右如日之升五百  
歲而生已開昌歷億萬年其永益鞏皇圖

鈐司進功德疏

爲天下君祥書帝武祝聖人壽歡動戎昭闡二氏之真科  
崇千秋之誕節皇帝陛下恭頌泰元有相長發申休在辛  
歲曰重光方升如日以乾元正五位多歷斯年

大行皇帝升遐本州進功德疏

帝棄群臣恐傳末命教宗二氏恭薦殊因慨極烏號戀深  
蟻慕大行皇帝伏願游神極樂觀化太虛十四聖之在天

皇靈陟降億萬年之與子丕祚綿洪

鈐司進功德疏

出宮駕晚繡素興哀望闕臺孤緇黃嚴薦恭哀冥福適相  
宸游大行皇帝伏願性悟真如道超無極成慶而垂萬世  
聿齊九廟之靈後天而彰三光長作百神之主

皇帝聖躬違和保安諸廟疏

天子萬壽詎期無妄之災臣人一心共後有神之神惟帝  
齡之悠久實神貺之扶持名山大川尚鑒蘋蘩之意普天  
率土不勝葵藿之私

本州宮寺保安疏

皇極九五福合率土以傾心帝壽千萬年顯慈尊而請命  
皇帝陛下伏願寅畏享國清明在躬王受命無疆惟休誕  
迎和氣天行健自強不息丕享脩齡

鈐司宮寺保安僧疏

惟聖宅尊共祝一人之慶以臣請命敬皈三寶之慈皇帝  
陛下伏願歷數在躬神明其德九五福曰壽丕享康寧億  
萬載齊天式臻永久

道疏

率土傾心均願聖人之壽顯天請命肅殫臣子之忱

同前

大行皇帝遺詔本州成服道疏

道揚末命忍聞晏駕之音瞻仰昊天上訴遺弓之慟脩崇  
冥果攀慕遐征大行皇帝伏願返于混元光我烈祖洋洋  
而在上俯察臣民剡剡以揚靈永綏宗社

僧䟽

捧九天之遺誥帝馭何追皈三寶之真乘臣心欲割

鈐司成服道䟽

昊穹降割悵宸馭之上賓率土興悲望帝庭而哀籲度資  
冥福適相仙遊大行皇帝伏願靈德昭回皇明陟降衣冠  
雖邈會烈祖以在天宗廟如存朝百神而為主

僧䟽



昊穹降割慟玉仗之上賓率土興哀望金仙而仰籲虔資  
冥福適相仙遊

本州成服滿散疏

制嚴易月痛君父之通喪望極乘雲薦人天之勝果露香  
跼踏釋經悲傷大行皇帝伏願堯性常存舜明不隔成慶  
而垂萬世聿齊九廟之靈後天而彫三光長作百神之主

鈴司成服滿散疏

捧易月之制書萬邦哀痛脩升遐之冥果三寶證明喪紀  
有嚴孝思罔極大行皇帝伏願羹墻不遠劍舄如生帝鄉  
而乘白雲真游冲漠孫謀之注豐水遺澤深長

大行皇帝本州追嚴道場疏

維新陟王悵皇靈之日遠演大乘法資勝果於天游悼痛  
深深薦言有倣大行皇帝伏願性超清淨德邁圓通生爲  
帝沒爲神豐功不泯高配天厚配地明德無疆

鈴司追嚴道場疏

皇靈冲舉莫追汗漫之遊淨業真如式薦逍遙之果終天  
哀痛率土慕思大行皇帝伏願陟降太虛超升無極儼橋  
山之劍舄 云云

申省狀

辭免新除秘書省正字狀

具位文天祥照會十月二十六日伏準省劄十月三日三省同奉聖旨文天祥除秘書省正字者某猥以踈賤叨被聖恩望闕瞻天莫知所措伏念某自叨親擢未歷外庸以讀書學從政之方以奉祠爲書考之日方竊山林之暇敢圖臺省之登負乘非宜循墻無任伏望公朝特賜敷奏令某滿足宮觀兩考日祇被新命其於出慶得宜庶幾無負聖明拔擢之意所有省劄未敢祇受除寄本州軍資庫外須至申聞者

再狀

具位文某照會於去年十月二十六日伏準省劄十月二

日三省同奉聖旨文某除秘書省正字者某伏念一介庸  
賤叨竊非宜加以從仕以來未有庸歷輒具狀申控乞候  
宮觀兩考滿日祇被新命十二月二十九日伏準省劄十  
二月九日三省同奉聖旨不允某除已望闕謝恩擇日前  
來供職外須至申聞者

辭免知寧國府狀

具位文某照會伏準尚書省劄子四月十七日三省同奉  
聖旨文某差知寧國府替朱應元缺者起家超躡望闕徘徊  
伏念某實無他腸粗有遠志昔年憂國冒當事任之難  
數歲杜門寧悔身謀之拙屬明良之胥慶念岳牧之疇庸

曾謂栖遲遽叨選用惟是某省愆已至貶秩猶新雖公論  
至久而愈明而冊書未謂之無過儻不量於出處是自速  
於顛隳欲望公朝特賜敷錫收回成命改畀叢祠使某得  
以讀書養親安身寡過他有驅馳之日無非報效之年所  
有省劄已寄留吉州軍資庫未敢祇受須至申聞者

文山先生全集卷之四終





浙江圖書館善本

甲 登記號：028717

一九 年 月 日







